

## 2 Samuela

# Yuwaa kirak Samuelarinee kuk kamanku anoo pakich kamanchintspa

### ¿Chakaja anoo yandarang?

Chakamasaja Samuelarinee kuk yandarangiya; nda yasakanaya. Israelchich tputs yandampan zapan taaranganaya. Uwshtisin uru yandarangana yuwaan Israelchich kurakawaa taarangana anootsi. Ashiriya, kirak mintam, mintam ashiru taarangiya. Apanllee kuk kamanipanitam kirakaa ashpatam yandaranganaya. Ashirucha, zapishparee, yuwanmun Dapiyarini tsiparangu anumun minamari kirak yandaranganaya. Na in, Samuelarini kuku, tputs ichingarusin atanaya.

### ¿Chakaama yandarang?

Utaáchich waanpatatin yuwaan zitamin urkar taarangana anoo mbiztaruneepa atusin, Samuelarinee kuk yandaranganaya. Kiraksha kizpur tuwapeeru, chawpishtarangusin, tsimbunaam wayarangusin, natsha in kirakaa tsimbun taariya.

### ¿Mayaatseeja kamanik?

Na yuvari kamanku anoo kamanchintspa.

Kapitoro 1—4: Saularini tsiparangu, Saulsha maachirita waanshuchee kurakaam ínamaam kapung chinaranganaya. Itaru, Dapiyatssha waantisin maachiri kurakaam ipusaranganaya.

Kapitoro 5 —7: Siete masach tushiychu, Israelchich ichingarusin Dapiyaa chinarangusin, tachitaranganaya.

Kapitoro 7—10; Dapiy Israelchichee undarar ichingaru wamari kasirangiya. Yaktap Irusarinap naakchu, Irusarinshuchee kasirangitamta. Anush, Irusarinush waama pang' pangurangiya.

Kapitoro 11 —25: Anush taar ashku, zapish Apanllee kajonarinee Irusarinap wayarangiya. Pangus pakich taspat panguyaru, anush wayarangiya. Itaru, uru Apanlleem pang' kapung pangumaam chinarangiya. Mach Moreyap, yap Apraham wipaa pachamaam machtarangu, anshutam Dapiy Apanlleem pang' pangumaam zandarangiya, Irusarinshu. Itaru Apanllsha, Shiy nuwaam pangumaam watsta. Watam shiy tputsee zapan pachayanllshawa. Iparish nuwaam pangoochparee. Shiyachchee urutamari kurak kasiru taamaam wayachima. Nuwaa itsinsaru tachitkusin, nuwsha urutamari istachima. Shiyashchee ayamtaati kapeetcheezi, Apanll tarangiya Dapiyaatsi.

## **Samuelarini kuzizimun yandarangu anu**

*Na kamanchintspa yuwaan Saularini tsipayaru,  
Dapiysha mazinarangu anootsi*

<sup>1</sup> Saularini tsiparamchu, Dapiy Amalekshuchee tputs zapan pachata sheeshinu, yusur pangup

Siklakap waptam kanapeeshinu, tsimbun zar maachu, <sup>2</sup> anush putam tuchparinishsha zar Saularini tiptsir yuwamand pachakaktarana anumand káyashinu, kizpur mang' mantsarangu, wamar izichim kamartaru, muchumunsha tsap wayaru, naatachu kusarangiya. Dapiyanungsha kuseeru, much tsapush timuchta ashirangiya.

<sup>3</sup> Dapiysha masharangu, ¿Yapsha káyashinsha? tárange, uwshat Israelchich pachakatarana anumand káyashinuri, ningeem suwayashinina, tárange. <sup>4</sup> Dapiysha, ¿Mayaatssha suwarangsha? Natu nuwaatssha kamaninda, tárange, uwshat, Israelchicheetscha tputs Amalekshuch sundar zapan pachakatunusin, anoo punikuri, suwayashinina. Kurakaatstam Saulaa wipaptari Jonatanpatari pacharanganaya, tárange.

<sup>5</sup> Dapiysha, ¿Tamasha itaru yasaksha yuwa Saularinee, wipaptari pacharangana anootsee? tárange. <sup>6</sup> Uwshat, Nuwaana parangina. Machip Guilbowap xiytat ashiranguri, yap nda chinari amb nap ashiranguri, Saulaa parangina, k'chirpunguriptini tushuwimchu anootsi. Undararshitisin anungaz pachapani atusin, kapaachumun pshiyrshini kamatamaamamsha tachitatar ashiranganaya. <sup>7</sup> Uwshat anuritam uship natpunuyaru, nap ashirangu, nuwaatssha parangu, nuwangaz kuruzurangiya. Nuwshat ayu aturi kusaranguri, <sup>8</sup> nuwaatsshhat masharangu, ¿Shiy yapitsha? tárange, nuwshat, Amalekshuchtana, tárange. <sup>9</sup> Ashiriya, uwshat nuwaá tárange. Kiyungcha kachiykachi. Naturi kchitaateena ashiritaa, shiyshat

pchanda, tárangu, nuwshat napkuri kizpur wanguy parangina, <sup>10</sup> watam yusur waanaatsi m'chitpat kayungaranguwa. Ashirucha, ¿tamari ashim támach? túri, izuurusha pachayaruri kasarangina. Sheeruri, wayarangashee watutiyachee, pazusheetstam ashpari yaranguri, na ningshat shiyaam panati túri payutarana, tárangiya. <sup>11</sup> Dapiyshat, mishat muchchurtamsin anoo mazinarangusin, mang' mantsaksin, waanaatstisin wamar putayarusin izichiranganaya. <sup>12</sup> Kapung tanurangusin, kizpur mang' mantsaranganaya, Saulariningaz, mishat Jonatanarinigaztamta. Mishat, Israelchichee wasundurur Apanllee ipusamarini zapan pacharangana anungatzam kapung mang' mantsarangusin, katungtsee mangurangusin, minum zar puranganaya. <sup>13</sup> Ashirangsin, anumun yusur Dapiy tsiyatssee kamanimapanee masharangiya. ¿Shiy zuwaa, yapichshasha? tárangu, uwshat, Nuw arapichtana Amalekshuchi tputsi, tárangiya. <sup>14</sup> Dapiyshat kapung tsiyatarangu, Itaru, ¿mayaamshat shiyshat yuwaa waana Apanll kurakaam ipusarangu anoo pacharangsha? tárangu, <sup>15</sup> Dapiy wasundururee kamachtarangiya. Natu, pachayarush ksangi, tárangu, sundarsha k'chirpungpa kayungarangu, izuuru pacharangiya. Anshat sundar pachakchu anush <sup>16</sup> Dapiyshat tsiyatarangu, Watam shaana, Nuwcha pacharangi, átshawa. Shiy Apanllee ipusamarini kurakaa pacharangush, shaanpatatarit tsipanish tuwapangcha. ¿Antaati mangutazini shiyya pachakinee? tárangiya.

Ashiriya, na kamaneena yuwaan Saularini tsipayaru, anoo Dapiysha mazinarangu anootsi.

*Ashiriya, na kamanchintspa yuwaatssha Dapiyarini Saulariningaz, mishat Jonatanarinigatzam mang' mantsaku, yaseeku tanutantar ashirangu anootsi*

<sup>17</sup> Dapiyarini Saulariningaz, Jonatanangatzam kapung mang' mantsaku, yasiyastar ashirangiya.

<sup>18</sup> Sheeru, tputseetssha kamachtarangiya. Nee yaseesshish Utaárinchicheemsha nlluranur tayaspatangtsa, táranginya. Jasershhat anoo tsiyatsis zurrampatari yandayaru kasarangiya, yuwaan kapung mang' mantsarangana anootsi.

<sup>19</sup> Ashiri Israelchichis mazinangtsa.

Na zar yuw kizpur kurak taarangu an machip tsap pacharanganaya.

Mishat, Israelchicheetstam zapantam pacharanganaya.

<sup>20</sup> Ashiriya, anoo siysat Filistewshuchip watsapun Gadap,

mishat Askalonpitam kaman, kaman shirintspa,

iyaa nda mantsir tsiyatamaama.

Filistewshuch wizanur anoo mazinakchusin, nda mang' ksamaama,

mishat yashingchichtam nda shambatkusin tsingá, tsingá ashimaama.

<sup>21</sup> Mishat, machip Guilbowap tputs zapan tsi-parangana amb,

nda sinamaam Apanll arap sinaa kapeetachpa. Watam amb kurakawtamsin,

mishat Saularintam tsiparangu xanxapshiri-neetsi anshuri kasaranguwa.

Undararshitisin nda kurakurtaru taamaam atusin, anumun iwaz tsarunpat katitar ashiranganawa.

<sup>22</sup> Saularinaa, Jonatanarinaa,  
uru kundarareetsis kasiyarus, mangis kis kanapurangsa.

Siyamari urutamari kizpuris tapazpanimunis m'chitaris,  
k'chirpunguritamtis kurasinandari wayungunupat paxatarus,  
sundarpat waratamapanpat pachakaktangat ashirangsa.

Itaru, siyaa kurakaatstaatis tputs pacharanganaya.

<sup>23</sup> Saularinaa, Jonatanarinaa,  
siyapa kapungtaa chinataruni,  
ipunarus taarangus, natshat ipunaritamtis tsiparangsa.

Yungan ashirus mikeerus kusta sheerus, tputsee pachata, pachata ashtarisi.

Ashkus, siyamari tputsee kasikus,  
kuwitsam ashirus taarangsa.

<sup>24</sup> Ashiriya, siysat Israelchichis kizis,  
Saulariningazini tanungints,  
watam kizpur kurak wamar wanasisrimash kurakurtamamash kamartamba ashtaruwa.

Watunirimun wing oroopat siritam wayarangasheem kamartamba ashtaruwa.

**25** Kizpureetstaa kurak tapazish pacharanganaya.  
Jonatanarineetsshat ambitam machip tsap  
pacharanganaya.

**26** Jonatanarinaa, nuw shiyangaz kapunguri  
mangi mantsakina,  
watam shiyapat kis ipunaranguni,  
zuwanllpazini ashiruni taaranganiwa.

¿Shiy wanipaja nuwaa istarangish?

Shiy nuwaa kapung chinarangush,  
kizpur wanasis nuwaa ksutarangsha.

¿Nitaati kizanaa amb ashiru chiyaa chinatareeja?  
Itaru, shiyhat anoo kánuru kapung nuwaa chi-  
narangsha.

**27** ¿Tamashat shiy kizpurimunataatish,  
shiy tapazish tsiparangsha?

Ashirangush, k'chirpungurimshitish ichipamaw  
tamutamur ashkiya,

ántar ashirangiya Dapiyarini Saularingazini,  
mishat Jonatanaringatzam tanuku.

Ashiriya, na kamaneena yuwaa Dapiyarini  
tanuku, wayas yaseeku ántar ashirangu anootsi.

## 2

*Dapiyarini Utaáchcheem kurakaam kinarangu  
anootsshhat kamanchintspa*

<sup>1</sup> Anumun zapish Dapiyarini Apanllee  
masharangiya. Apaa, ¿tamacheezi? ¿Waptamtazuwa  
Utaáp yakat naachinawa? tárange, Apanllsha,  
Ashiri naangsi, tárange. Dapiyhat, Apaa,  
¿yapeeja naachi? tárange, Apanllsha, Hebronap  
tsap naattacha, tárange. <sup>2</sup> Dapiyhat anuritam

wizanll tsimbunari, Ahinowam Jesreelshuchee kiz yamarangu an, mishat mashindoo Nambalarinee wizanll Karmelshuchee kiz Abigayila sur yamarangu anpatatam naataranganaya.

<sup>3</sup> Mishat, wipunasheetstam yuw waanaatsi kizpur ksutamapaneew taarangana, anootstam ichingaru maachiritpatari machtarangiya. Ashirangu, Hebronapshat yakat taaranganaya.

<sup>4</sup> Anumunshat Utaáchichshat tputs anshutam tsiyatamaam kusaranganaya. Kuseersin, Dapiyaa Utaáchcheem urkar ipusaranganaya.

Anush Dapiy tsiyatssee yusur mazinarangiya. Natunaa tsiparee Saularinee yakat Galaadshuch tputs Jabeschich mapurangsintanda, mang táraganaya.

<sup>5</sup> Dapiyshat anoo mazinarangu, tsiyatssee tputshish zanganirangiya. Zuwaan yungparangtishcha, yuwamand tsiparee Saularinee kapung chinarangush mapurangish, anumand uru Apanll shiyya kapungtam chinachiya. Apanllpa shiyya mangeetsish p'tseerangiya.

<sup>6</sup> Na nimand Apanll shiyya kapungshapari chinachiya; taarasheetstamtish urutamari wanasis ksutchiya. Nuwshat yuwamand ashirangish anumand shiyya kapungtam chinakina. Siyaa uru nuw ksutchina.

<sup>7</sup> Siy kurakaris Saularinee tsiparangitaatiya, itaru siysat kizpurtangtsa; sambaytarintspa. Nuw siyaa ksutchintspa. Watam nuwaa Utaáchich tputs kurakaam na ipuseenllinawa, táragiya.

Ashiriya, na kamaneena yuwaa Dapiy Utaáchcheem kurak kinarangu anootsi.

## 5

*Ashiriya, na kamanchintspa yuwaatsshat Dapiyarini kurakaam kinaru, Israelchicheem mishat Utaáchcheemtam ksutarangu anootsi*

<sup>1</sup> Zapishtshat Israelchich mang Dapiyangaz tsiyatani atusin, Hebronap tsap naataranganaya. Ambshat kusarangsin, Dapiyaa, Iy shiyapat maachiritanicha. Kurasirini anchichinandarita. <sup>2</sup> Iy kurakarini Saularini kizpuritaa kurak taarangu, itaru shiyshat anpur zurampatari iyaam kapung tapazeem istarangsha. Ashiriya, natshat Apanll shiyyaa kurakaam ipusarangiya iyaam Israelchicheemani ksutamaama. Na shiyshat iyaatstam ksutangcha, táranganaya. <sup>3</sup> Ashirucha, amb taani tárangusin, ichingaru wachinanur Israelchich kurakangaz tsiyataani atusin, Hebronash yakat kusaranganaya. Sheersin, wanasis tsiyatsis zurampatari waana Apanll paru tsiyateersin, Israelchicheemtam urkar Dapiyarinee ipusaranganaya. <sup>4</sup> Dapiyarini 30 masachirini taachu anush kurakaam kinarangiya. Sheeru 40 masach kurakaam kinaru taarangiya. <sup>5</sup> Hebronash yakat 7 masach anumun chawap, Utaáchcheetsim ksutarangiya. Anumun ichingashat yakat Irusarinaatstam, Israelchichpatarishat washunand Utaáchchpat 33 masach ksutarangiya. Amb ashirangu washunand 40 masach kurakaam kinarangiya.

Ashiriya, na kamaneena yuwaa Dapiy Israelchicheem, mishat Utaáchcheemtam kurakaam kinarangu anootsi.

*Ashiriya, na kamanchintspa yuwaatsshhat  
Dapiy machip Siyonap sundaroo pang'  
tandapunuzee itutsirangu anootsi*

<sup>6</sup> Kurakshat Dapiy Jebusewshuchee pachani tayarandsin, ichingaru wasundurur ashpari Irusarinap ngoots naataranganaya. Yuwshtisin anush tsap taarana anshitisin, Jebusewchich Dapiyaa nda puniranganaya. Mangush chinrangusin, ¿Tamari nish tandapunuzish pshtuchinllina? tárangusin, Dapiyatsshhat mantsir tsiyataranganaya. Shiy ¿tamareeja tputs wach mchus tamatarpari ashirush, nda waritarush, iyash tandapunini shiy pshtuchish? tárangeanaya. <sup>7</sup> Itaru ashiritaa, Dapiyshat nda xapoorangiya. Mach Siyon kámanamtaa anush pshturangiyi. Ashirangu, anumandari na wandari Siyonaa Dapiy yaktarini atanaya. <sup>8</sup> Dapiyshat wasundururee kamachtarangiyi. Natu, siysat Jebusewshuchee tputs pachamaam kungush pshtuyarus, arangeem tandapunuz shitungeerus, ashpari wach mchusawaa, wats kuyamcheewaatstam pchashinints. Anuwaan tputs nuw kizpur tsachikina, tárangeiya. Ashirucha, yuwamand Dapiyarini tárange anumandari anpur zar tputs wach mchusawaa, mishat wats kachumbeewaatstam, Apanllish pang' pshtumaam watsta, tárangeanaya. <sup>9</sup> Anumun iwaz Dapiyshat anush pangoom wayarangiya. Ashirangu tputsshitisin anuritam Dapiy yaktarini tárangeanaya. Anshat Dapiy pangoom pangurangiya. Sheeru, anumun iwaz ashchirisha pangusee tandapunuzpat taturpirangiyi. Tándsamand tandapunayashinusin, kurakanung-

sha pang' katsiparanganaya.

<sup>10</sup> Ashirangu, Dapiy aranginasha kizpur kurakaam kinaru taarangiya, watam Apanll kizpureeru ksutaranguwa. <sup>11</sup> Ashirucha, kurakshat Irám Tirshuch yakat zapan karipanaa kurakaam Dapiyaam pang' zanganirangiya. Tarawzupaneetstam, mishat patumbchee apusash pátangampaneetstam zanganirangtamta. Sheersin, anpat Dapiyaam pang' karipanpat wanasis panguyarusin kasaranganaya. <sup>12</sup> Anush Dapiy waanaatsi aranginashat yasarangiya yuwaa Apanll Israelchicheem ksutamaam kurakaam ipusarangu anootsi. Mishat, yuwaatstam waanaatsi kukoo Israelchich kapung payurangana, anooststam yasarangitamta.

Ashiriya, na kamaneena yuwaa Dapiy Siyonaa yakat itutsirangu anootsi.

*Ashiriya, na kamanchintspa yuwaatsshat  
Dapiy yusur minushshat wizanll wipaam  
pzapaneerangu anootsi*

<sup>13</sup> Dapiy yuwapur Hebronash, mishat Irusarin-shutam yakat kusarangu, anpur aranginashat wizanlleem yamarangiya. Anushshat mashingamash wizanll zapan wipaam iparinarangiya, kamuzatam, kizatamta. <sup>14</sup> Ashirangu, wip zapan Irusarinash nllurtarangiya, sur Samuwa, Sobab, Natán, Saramun, <sup>15</sup> Ibhar, Elisuwa, Nefeg, Jafiya, <sup>16</sup> Elisama, Elíyada, mishat Elifelet. Aship Irusarinash yakat nllurtaranganaya. Na kamaneena yuwaatsshat Dapiy yusur minushshat wizanll wipaam pzapaneerangu anootsi.

*Ashiriya, na kamanchintspa yuwaatsshhat  
Dapiy Filistewshuchhee kasirangu anootsi*

**17** Filistewshuchshitisin yuwaa Dapiy Israelchicheem kurak kinarangu anoo yasaranganaya. Ashirucha, Dapiyangaz pachamaam zandarangsin, kapung tsangaranganaya. Itaru, Dapiyshat anoo tsiyatsis mazinarangu, pangush tandapunuzish pshturangyi. **18** Filistewshuchshitisin nda kasamaam zandaranganaya. Annungiri watsiri Refayimanungiri wazaw ksutaranganaya. **19** Ashirucha, Dapiyshat Apanllee masharangyi. Apaa, ¿tamachina, Filistewshuchhee pachacheeze? Nuwaam wizpurirish pananda. Waratchinipa, tárangu. Apanllsha, ¿Tamanda? Pachangsints. Nuw shiyaam wizpurirish panachinllpa shiyamari kasimaama, tárangyi. **20** Dapiyshat anuritam waratarangu waamari kasirangyi. Ashirucha Dapiy tsiyatku, Apanll nuwaam kapung istarangu, nuwamari kundarareetsi kung zaw ashkachu, maacheetsi izuuru ashpari tpachingtaru, nuwamari ashirangina, tárangyi. Amb ashirangu, anumandarisha anoo tsap Baalperasim átu ísamarangyi. **21** Anshat Filistewshuch puniksin, suwasuwarangusin, ashpari apanllputsirineetsi anootsiri kasaranganaya. Dapiyshat wasundurur anoo parangusin, uwshtisin ashpari yaranganaya.

**22** Filistewshuchshitisin waptam suwyarandsin, wazaw Refayimashshat yusur tapazeem tasasaranganaya. **23** Ashirucha, yusur Dapiy Apanllee masharangyi. Apaa,

¿tamacheezi? tárangu, Apanllshat, Musá watsinsari pshturinllpa. Tsangayarinaaris, ushipshat iturpiyachus, yasin karipan xiyaru, anush puch kuseerus, <sup>24</sup> mazinazinawtsa, yuwari íwar yasinap xux, turutut, táchayu, anuritam siysat kaapanaapa. Waatatanda nuw siyaam istakachuri ashtachi. Anuritam tputsee Filistewshuchee sundar pachanantsa, tárangiya Apanlli.

<sup>25</sup> Dapiyhat yuwartatam Apanll tárangu, anuritam tuminurangu, Filistewshuchee zapan pacharangusin, Gabawonamand tsap yáyarusin, Guesermun kasaranganaya.

Na kamaneena yuwaa Filistewshuchee Dapiy kasirangu anootsi.

## 6

*Ashiriya, na kamanchintspa yuwaatsshhat Dapiyarini Apanllingaz kajonarini yakatssin, ashpari wasundururpat naataranganana anootsi*

<sup>1</sup> Dapiyarini yusur wasundururee yuwanandari kizpuri annandari Israelchichinand 30 mil taarangu, anoo ashpari kuruzurangu, yusur shaniyaranganaya. <sup>2</sup> Sheersin, yakat Baalamand yuwash Utaáchich tputs taarangana, anumand káyarandsin, ashpari wasundurur Apanllingaz kajonarini yakatssin naataranganaya. Watam Apanllimun kajonarini yuwash tsimbun tputs ashiru wazirpungach wanind imangakakaru, anush apusash Apanll wan kizpur wamari kasiru taakuwa. Ashirucha, anumun Apanllimun kapung mang' taturanganaya. <sup>3-4</sup> Anshat

machip Abinadabash pang' Apanllee kajonarini pshiyrshish kaneeschish pshtayarandsin, Abinadab wip tsimbunari Us, mishat Ajyon ashirusin pshiyrshishee tununeerandsin, Apanllee kajonarini yátaranganaya. Ajyon pshiyrshishee imazaru pshiyraranginya.

<sup>5</sup> Dapiyshitisin ichingaru wasundurur Israelchichpat Apanllee kajonarini arangeem imazarsin, shambatkusin, kapung yaseerangusin, michitkusin, tamburtarangitamsin, kitaraatstam, kambanaatstam, charcharaatstam, ngusambaatstam tamburtarangusin, ambiri zamangakatarat ashiranganaya. <sup>6</sup> Anshat kajonee yáyarandsin, yuwash maacheetsi wach tuchuwtampaneem Nakona atusin wayarangana, anush kuskamchusin, machipshat kárkusin, tor kapztaranllu, Apanllsha kajonarini wazawap kuripungamaam zandarangiya. Ashirucha, Usshat kuripungtapa átu, kajonee uwpat tamanda ashku Apanlleetssha kajonarini patatarangiya. <sup>7</sup> Apanllsha anumand kapung tsiyantayaru, Usaattssha waneerangu, yuwari patatkamchu, anuritam Apanlinnungiri kajonarini tsiparanginya.

<sup>8</sup> Dapiyhat kapung tsiyantarangiya yuwamand Apanll Usaa waneerangu anumanda. Anumandarisha anoo tsap Peres-usa atusin ísamaranganaya. Anshat tsap yuw ísamarangana na wandaritam taariya. <sup>9</sup> Dapiy anpur zar Apanllee kapung punirangiya. Ashirucha, tputsee tsiyatarangu, ¿Tamayareezi nuwaana Apanllee kajonarini yachi? <sup>10</sup> Watstaya, tárang, anootsirishat apusari Gadchichish tputs Obededomash pang' yapshtuyarusin kasaranganaya.

Dapiy waanpee yaktarini yamaam punirangiy. 11 Anshat Apanllee kajonarini Obed-edomshuri pang' kasarangusin, anshuri tuchip tsup taarangiy. Ashirucha Apanll kajonarini anush taarangu, anshucheemshat tputs, ichingaru maachiritaamtam Apanll kapung istarangiy.

12 Tputtshitisin tsiyatssee Dapiyaa kamani-ranganaya, yuwamand Apanll kajonarini Obed-edomash pang' taaru anumand Apanllsha Obed-edomaam kapung istarangiy, chinoomtam, maachiritaamtam, ichingaru anshucheemtam tputs istayanlliya, táraganaya. Dapiyshat anoo mazinarangu, kapung mang' ksarangu, Apanllingaz kajonarini yakatu naatarangiy. Anushshat kusarangu, Apanllee kajonarini Obed-edomash pang' yáyaru, waanpeeshat yaktarini Dapiy wayarangiy. 13 Anshat Dapiy Apanllee kajonarini Obed-edomash pang' yakchusin, pangusimand 6 kateersin, anootsiri Apanlleemsha ungirtapani atusin, toroo minum pachayarusin, opeejaatssha minumtam pachaku sheersin, Apanlleem muchiranganaya.

14 Dapiyshat ktun wanushish kizpur wanasirimash kamartayaru, Apanllee kapung shambatku, michitku, yaseerangiy. 15 Dapiy Israelchichpat Apanllee kajonarini yáyarandsin, mang' kis shambatkusin, tamburtarangusin, wakarash wits puu puu ántangatssin, zamangakatarat ashiranganaya. 16 Anshat Apanllee kajonarini Dapiyash yaktarini yushindakamchusin, Dapiyshat wizanll, Sularini wip Mikal yuwaákatanana anoo mazinarangu, pangumand wach tuzambeeru, nap ashku, yuwaá wazaranll Dapiy

Apanllee kajonarinee yamazaru, shambatku, tsinga, tsinga shitanu, anoo parangu, uwshat nda kis naparangiya. ¿Mayaamshitaja amb ashik? tárange, napamaam ngatarangiya.

<sup>17</sup> Anshat Apanllee kajonarini yushindayarusin, Apanlleem Shaniyshini yuwash Dapiy, Apanlleem kajonarinee wayachima, átu, taspat pangurangu anush wantsush wayaranganaya. Sheersin, anuritam Dapiy yusur maacheetsi pachayarusin, Apanlleem tatsuyamaam wayaranganaya. <sup>18</sup> Anshat Apanlleem waamari kasiru taaku, anoom ungirtaksin maacheetsi muchim yuwaparamchusin, <sup>19</sup> ichingarusin Israelchich yuw anush kamuz mishat kizatam shaneerana anoomshat minam pang, dátiles minamtam kil, kizarunshat puzam minamtam kil sheeru, panat panat ashirangya. Ashiramchusin, pangup yusur kanaputaranganaya.

<sup>20</sup> Dapiyhat pangup kanapurangtamta, Maachiritamsha Apanllee wizpur panakamchu. Itaru, wizanllshat Mikal Saularini wip wazaranllee paranllu wazaranllingaz shturanllu, ¡Kizpur wanasis ashirangsha! Israelchichish urkarish shaanaatsi nutsish wanasis tuyamandarangsha. Itaru, ashirangtaateesha, ¿antaati m'chachurshitish kizaw anoo ksaja parang? Mikal tárange. <sup>21</sup> Dapiyhat yamarangu, Anootssina zurkush átsha. Nuw michitarangtana. Itaru, nuw mangutazi ashki. Apanllee shambatkuri ashirangina, watam waana nuwaa kurakaam ínaranguwa. Aparish tsiparangu anush kurak zamumaam shiyaamtam maachiritish ichingaru Israelchicheem

ksutamaam nuwaa kurakaam ínarangiya. Ashirucha, anoo nuwshat mangi ksakuri Apanllee kis ungirtakina. <sup>22</sup> Apanllimand wamin aranginasha michitarangina. Shiy shaaniparee nuwaa, Mantsircha ashkish tátsha, yusur michitchitamparina. M'chachuri kizaw kisshapari napchinllinaya, tárange. <sup>23</sup> Táyaru, Mikalaatssha arap zanganirangu, ndushat Mikal wipaam mireerangia.

Ashiriya, na kamaneena yuwa Dapiyarini Apanllingaz kajonarini yakatssin naatarangana anootsi.

## 7

*Ashiriya, na kamanchintspa yuwa Dapiy Apanlleem pang' karipanpat pangumaam zandaranguanootsi*

<sup>1</sup> Dapiy pangoom kapung pangurangu anpur, Apanllshat Dapiyaam kapung istarangiya, pangush mapiyru taamaama. Mishat, nda undarar arang muntamaam mangooz mapiyimash undarareem kasarangiya. <sup>2</sup> Ashirucha, Dapiy apanllpaneetssh Natánaa tsiyatarangu, ¿Tamari nuwnaashat tputsi pangus wanarissh karipanpat panguma anush taachi? Itaru, Apanllinaashat kajonarini nda ashimash taaku, maachitpat tas panguma anush taaruwa, tárange. <sup>3</sup> Natánshat, Ashiri shaana mangishish chinakish anuritam shingcha. Watam Apanll waana shiyaam kapung istaranguwa. Waanapari shiyaa mangeetish p'tsichiya, tárange.

<sup>4</sup> Apanllshat anuritam zar psaan apanllpanee Natána tsiyatarangiya. <sup>5</sup> Ashiriya, shiyashat

Natánaa, Dapiyaa kamaningcha, Apanll  
 ateeja shiyaatsi. ¿Antaati kaapa shiyaja  
 nuwaam pangí panguchish? ndunparee.  
<sup>6-7</sup> Yuwapurutaa Ijiptosh tsap tputsireetsi  
 Israelchichee tashitungarangi, anpuritaa zar  
 nuwaam pangeemi uru maachitpatari tas  
 pangurangashinllinaya. ¿Antaati sirútamastaati  
 yuwapur tputsiripti apusap tsap xiranguni,  
 nuwaana tputsireetsi Israelchichee kurakaam  
 ipusarangi anin nuwaam pangeemi karipanpat  
 wanasir pangutarazinllinaja? nduni, átanda  
 týarush, <sup>8</sup> yusur arang tputsireetsi Dapiyaa  
 kamaningcha. Ateeja Apanlli nuwamari  
 kizpureeruri, shiyaa nuwaana ipusaranguri,  
 tputsireemi Israelchicheem ksutamaam  
 shiyaa wayarangina. Watam chinuzpaneem  
 ksutamapan taarangish, anoo itutsiranguri,  
 nuwaamshat tputsiri ksutamapaneepaz ashiru,  
 nuw shiyaa wayaranginawa. Ashiranguri,  
 shiyhat na ashparitaa tputs ksutaksha.  
<sup>9</sup> Nuw shiyaam kapung ksutarangina yaptam  
 naatarangish ambeewtamta. Kundararish  
 shiyaa pachamaam zandarangana anoontam  
 shiyamari kasimaam nuw shiyaam kapung  
 istaranguri, kundarareetsish kasirangsha.  
 Mishat, nuw shiyaam kizpureem kurak ínayaruri,  
 kasarangina. Waani wamari ichingaroom  
 tsapurunas kasiru taachpa aturi, ashirangina.  
<sup>10</sup> Shiyaaam tputsireemaruri Israelchicheemis  
 nuw yuwaam tsap kizpur wanasiri anoo ipuseeruri,  
 nishpari mapiyrsin taachinllinaya. Nda tputs  
 ayamtaati yusur muntachinllinaya, táranguri,  
 tsapoo ipuseeruri wayarangina. <sup>11</sup> Waani

nishuri tsap waantisin kurakaamaw kinayarusin watsapunee ksutchinllinaya, táranginawa. Na shiyshat shaana kurakaam kinarangush, kundarareetsish shiyamari kasichsha. Mishat, nuw shiyaam chinllinish zapan panachinllpa.

**12** Shiy ayam wachinayarush, tsipaktaateesha, nuwshat uru shiyachchee chinllinish urutamari ksutchina. Ashkachuri, waantisin kurakaam kinayarusin, waanpatatin chinachinllinaya.

**13** Sheersin, nuwaamtam pangipanguchinllinaya. Ashkatssin, nuwshat ksutkachuri, urutamari tiptsiree wanasis ksutchinllinaya. **14** Ashkachuri, nuwaa wapareetspaz ashtachinllinaya. Nuwshat ipareetspazi ashiruri, kapung istachima. Nuwaa kuki kapeetkatssin, nuwshat waneekchuri, tputs wipaa waneeku yasinpat pzkoottaru nuwshat ashtachima.\* **15** Itaru, ashkachtaateena, nda izuuru Saularinee kapeetarangi nda ashtachima. Ayamtaati niyrcheezi. **16** Shiyachchimari chinllinish kurakaam kinakchinllina. Anoom nuwshat istakachuri, kapung ksutchima. Ashkachuri, uwshitisin urutamari nuwaa tputsiri ksutchinllinaya, átcha Apanlli, támatcha, Apanll tárangeya Natánaatsi.

**17** Natánshat anuritam Dapiyaa kamanirangija, yuwaa ashpari parangu, kukoo mazinarangu anootsi. **18** Dapiyhat anoo mazinarangu, yuwash Apanlleem kajonarini maachitpat tas pangurangana anush Apanllpa tsiyatkamchu, pshturangija. Apanleetsshhat tsiyatku, Apaa, ¿nuw chakina? Itaru, ¿tamamshita nuw maachiriti

---

\* **7:14** Utaáshucheema 12.7 tsiyatsis nipta tatsamooru taaritamta.

yuw ashtachish anoo? <sup>19</sup> Apaa, ¿tamasha amb ashiru nuwaa tputsireetsish chinarangush, nuwaam kapung istamaam zandkush átsha? yuwaan shaana tputsirish ayam nuwachich nlluranur kurakaam kinachinllina anootsee. ¿Nitaati tputs minumtiyam ashim shiy taatareeja? Shiyamari kizpur wanasir istaksha.

<sup>20</sup> Apaa, watam shaana nuwaa tputsireetsish yasakshawa. Ashiri nuw ¿mayaatsi arang tsiyateechi? <sup>21</sup> Mishat, watam shaana Apaa, yuwaan ashtachish anoo nuwaam kamanirangush, uru yuwaan táyanlli anoo izuuru tatsamchima, tárangshawa. <sup>22</sup> Apaa, shiyamaricha kizpurish kurakish taakish. Arang tputs ashim tsapurunasush wanindaja. ¿Wanipaja yuwaan tputs shiyaa surish tsiyatkanan anoo mazinayanllee? <sup>23</sup> Shiyaatsimari tputsirish Israelchichee tpuseersin tsiyatkanaya. Ashim tputs nish tsapurunasish wanindaja. Nimaritssincha kizpur wanasir taakana, ántangat ashkanaya. Watam Apaa, shaama tputsirish ipuseerush, tashitungarangush, kizpureem wanasirimsheem ínarangshawa. Ashirucha amb ashirangush, natshat wamaritin tputsee tpxutarsin taakanaya. Mishat, watam shiy tputsireetsish Ijiptosh tsap tashitungarangish, anpur uwshuisin anungaz tachitarangsin, itaru shiyhat ashpari tputsee apanllputsirinpatari izuuru kapeeteerush kasarangsha.

<sup>24</sup> Watam shaana zandarangush, shaama tputsirish Israelchichee ipusarangshawa. Ashiri uwshuisin urutamaritam shiyaa chinachinllinpa. Shiyhat tputsireetsish ashtachtamsha, atina.

**25** Ashiritam, na Apaa, shiyaa Apanllireetseeruri táshina. Shiyhat urutamari nuwachchee chinllini ksutangcha. Yuwaari tsiyatarangish anuri tuminungcha. Urutamari nuwachich taachinllinpa. **26** Amb ashkachush, tputsshitisin shiyaa urutamaritam streetsish yasachinllinaya. Yasakchusin, Israelchichimaricha Apanllirini kizpur wamari ichingaroom tsapurunas kasiru taaku, táchinllinaya.

Shiyhat nuwachchee nlluranur, tputsireemish ksutkachush, uwshtisin kizpur taachinllinaya.

**27** Apaa, shiyamari kizpureerush, Nuwaawasina kamanirangsha, yuwaa nuwachich nlluranur kurakaam kinachinllina anootsi. Ashirucha, shiyataa nuwaaw tputsirish, ashtaa nuw shiyaa kurakaatstaatish yasapi túri, arang mashkina. **28** Shiy Apanllish kuraktishcha. Shiy k'keetsish minumtiyam ngichtareezish. Shiy uru tputsireemish kapung istaksha.

**29** Ashiriya, shiyhat nuwaaw istangandama. Urutamari nuwachcheem chinllini shaanaatsi wizpurirish panangcha. Watam shaana Apaa, nuw ashtachima tárangshawa. Ashiri nuwachchee nlluranur shaama tputsirish istangcha. Ashkachush, uwshtisin urutamari kurakaam kinaksin taachinllinaya. Ashiri ambiri ashkush taangcha, Apaa, watam shiyamari kizpurshawa, Dapiyarini Apanllee mashku tárangeiya.

Ashiriya, na kamaneena yuwaa Dapiyarini Apanllee tsiyatarangu anootsi.

*Na kamanchintspa yuwaa Dapiy Saularinee  
wachinllin istarangu anootsi*

<sup>1</sup> Minushshat zar Dapiy anshuchee tputs masharangiya. ¿Saularini maachiri taaritataja? Taarinaariya, nuwaa kamaningtsa. Jonatanarinee mbizamaam zandkeezi. Nuw anchicheem kapung istamaam zandkina, tárangeiya. <sup>2</sup> Anpurshat, Saularini tiptsir maacheetsi ksutamapan sur Sibaa taarangiya. Anootsshat kuruzurangsin, kurakash Dapiyash yushindaranganaya. Dapiyshat masharangu, ¿Shiy waatish surish Sibaayish? tárangeiya. Uwshat, Nuw watatana. Ksutamapan taarangi ani, tárangeiya. <sup>3</sup> Dapiyshat, ¿Shiy yasaktaatish? Saularini maachiri wand taarinaariya, nuw istamaam zandaktana Apanllimun suru, tárangeiya. Uwshat, Nuw yasaktana. Jonatanarinee wip minum wats tsimbunari wanguy taakiya, tárangeiya. <sup>4</sup> Dapiyshat, ¿Yapshat taaka? tárange, uwshat, Lodebarap tsap, Amelarinshini wip, Makirash pang' taakiya, tárangeiya.

<sup>5</sup> Dapiyshat kamachtarangu, Naayarus, yamashinints, tárangeiya. <sup>6</sup> Uwshtisin Mefibosetaa Saularinee wachinllin, Jonatanarineetsi wip yamayashinusin, Dapiyash pang' yushindaranganaya. Dapiyanung kuseeru, watsinung tsapush much timuchta ashirangiya. Dapiyshat, ¿Shiy surish Mefibosetish? tárange, uwshat, Watatana nuwa. Shiyaam kamachtashish naatti, tárangeiya. <sup>7</sup> Dapiyshat, Punirinllpa nuwaatsi. Nuw shiyya kizpur wanasis ksutchinllpa. Watam apariniptish nda natsatstamaam wanasis

tsiyataranginiwa. Shaama tsapunish pachirinish Saularini watsapun tuwanpuchinllpa. Na nimun shiy nuwamun misari katungkush taatsha, tárangiya. <sup>8</sup> Mefibosetshat yusur tsapush timuchta sheeru, Itaru, ¿mayaamaja nuwaa amb ashtachish? Watam nuw shiyaam m'chachurish taakchuri, tumuz tsipar tamapari ashiruri, nda waritaruri taachinawa, tárangiya.

<sup>9</sup> Dapiyhat Saularineetsi wamachtash Sibaa kuruzeeru, tsiyataranginya. Na ichingaru yuwa Saularini payutaru anoo, mishat chinootstam ichingaru wachinllinoomshat Mefibosetaam ashpari kasachima. <sup>10</sup> Ashiri shiyshat iparpatarish, m'chachuriptish Mefibosetaam watsapunish amuyaam tarawaztangtsa. Sheerus, maacheetsi wanusee pusayarus, waama panangtsa, kurakari-neemis wachinllinu. Amb ashkachus, uwshat nuwash pangti taaku, nuwamun misari ichingaru zar katungku taachiya, tárangiya. Anpur Sib wip 15 taaranginya. Muchchurshat 20 taaranginya. <sup>11</sup> Sibsha, Ashiriya, yuvari kamachtakish anuritam tuminchima, tárangiya.

Mefibosetshat kurak wip ashiru ichingaru zar Dapiyamun misarini katungku taaranginya. <sup>12</sup> Wipshat minum sur Mikayas taaranginya. Sibaatsha ashpari wip, mishat muchchurtamsin Mefibosetaamam tarawaztaranganaya.

<sup>13</sup> Itaru, Mefibosetshat wats wanguyaru, naamaam nda waritarangu, mapiyru Irusarinash tsap Dapiyamun misarini ichingaru zar katungku taaranginya.

Ashiriya, na kamaneena yuwaas Dapiy wamkuree wip Mefibosetaa istarangu anootsi.

# 11

*Ashiriya, na kamanchintspa yuwaan Dapiy Uriyasaa wizanlyamaranganootsi*

<sup>1</sup> Masach yunganpaskachu, kurakaw uru tapazeem pachakatssin shitungtaranaya. Ashirucha, anpasaru Dapiy, Jowabaatsim sundarpat urkar ichingaru Israelchichpatari sundar kamachtarangiya. Rabaa yaktari taturpiyarus, izuuru anshuri taxarayarus, ashpari Amónshuchee tputs kchingashinints, tárangeiya. Itaru, Dapiysha anshuri Irusarinash taarangiya.

<sup>2-4</sup> Anshat Dapiy kanusku, wiramash maarangu, zar puputarandhat chiyzayaru, paseektakshat íwar pangusip káreeru, naanat ashishtaru, piyamshat nap ashku, kiz kizpur wanasis chumattu parangiya. Anshat kiz kaneeschiri watsupir tatsameeru, kurasee kapeeteerurita. Dapiyshat, muchchuree kamachtarangiya. Napashini. ¿An kiz tamamaja? tárangeiya. Muchchurshat yasayashinu, Kurakaa, an kiz sur Betsabeycha, Elíyaamcha wipaya, Hititshuch Uriyas wizanlli, tárangeiya. Dapiyshat muchchuree kamachtayaru, kizaa yamayashinusin, Dapiyash pang' yushindaranganaya. Dapiyshat anpat kiz maarangu, mantsir patatarangiya. Ashiramchu, kiz yusur pangup kanapurangiya.

<sup>5</sup> Sheeru, kizshat mireerangiya. Dapiyaatsshhat kamanirangsin, Shiyaan iparish Betsabey mireeyanllpa, tárangeyanaya. <sup>6</sup> Dapiyshat anoo mazinarangu, ¿Tamaycheezi? tárange, Jowabaam tsiyatssee zanganirangiya. Shiyshat Uriyasaa

Hititshuchee nuwap zanganingcha, tárangu, Jowabshat Uriyasaa Dapiyap zanganirangiya.

<sup>7</sup> Anshat Uriyas Dapiyash pang' kuseeramchu, Dapiyhat masharangiya. Jowab wasundururpat tapazip naatarangana anoo ¿tamarim pakeeshinsha? tárangiya.

<sup>8</sup> Anshat masham yuwaparamchu, Ashiri natu-naa pangipish kanapeerush, izanllshish maa-matshacha, tárangiya. Uriyassa ayu tárangitaa, Dapiyash pang' shitungeeranllu, naatarangiya. Dapiyhat katungats kizpur wanasisimash yáyaru, mishat waasheemtam tputshish Uriyasaam zanganirangiya. <sup>9</sup> Itaru, Uriyasshat pangoo psaan tushiyaru, yapshat sundar ksutamapan maakana ambshat Dapiyanungiri pang' maarangiya.

<sup>10</sup> Dapiyatsshhat kamanirangsin, Uriyas pangush nda pshtuyaru maapa, tárangusin, Dapiyhat Uriyasaa kuruzeeru, masharangiya. ¿Mayaamsha shiy pangishish izanllshish nda maasha? watam zapan zar xirangshawa, tárangiya. <sup>11</sup> Uriyasshat, Watam naturitana Apanllee kajonarini, Israelchich sundar Utaáchichtam ichingarusin, mishat Jowabtam, nuw kurakari, tsipasawtamsin kurak shaana tputsirish na wandari wishchip masharpat tambtayarusin anush maakanawa. Ashirucha, ¿tamari nuwaamshat pangishi pshtuyaruri, misamun katungchee? Ashkachinaareena, izanllishti maakchuri, uru izanllpashti ipunchina. Ashkachuri, shiyaatsshapari tayutaritkachuri, Apanllsha shiyyaa kapung wanichiya, aturi, nda pangishi maarangina, tárangiya.

<sup>12</sup> Dapiyshat, Ashiri neetsiritama maangimasi. Pu zar tapazipsha naamchish, tárangeiya. Uriyassha ayu tárange, anshuri Irusarinash maarangiya. <sup>13</sup> Putamshat Dapiy katungtsee martarangu, waasheetstam yásirangu, Uriyasaa kapung tuwarsarangiya. Zar tapitaranllshat, Uriyas maakamchu, shitungeeranllu naatarangiya. Itaru, nda pangush maarangiya. Yap sundar ksutamapan shaneerana amb maakamchu naatarangiya.

<sup>14</sup> Putamshat Dapiy, kirakash yandayaru, Uriyasash Jowabaam zanganirangiya. <sup>15</sup> Anshat kirakash tsiyatsis yandam tárangeiya. Ashiri Uriyasaa yap tapaz kizpuri amb maacheerus, tuyamzangtsa. Sheerus, watsimari tasingayarus ksangtsa. Ashkachus, waani tputsshitisin k'chirpungpat kayungatssin pachachinllinaya, átu, yandam zanganirangiya.

<sup>16</sup> Ashirucha, Jowabshat anuritam tapazip Uriyasaa macheeranllu, yaktash kuseersin, arang taturpiyarusin, Jowabshat Uriyasaa yap sundar kizpurinandari shaneerana, amb tuyamzayaru zanganirangiya. <sup>17</sup> Anshat Jowab wasundururpat tapazish pshtukamchusin, uwshtisisin tistarangusin, Dapiyaa wasundurur tsipasawa kurak ashpatam pacharanganaya. Anshutam Uriyasaa pacharanganaya.

<sup>18-19</sup> Ashirucha, Jowabshat tputsee minum zanganirangiya, tsiyatssee Dapiyaam kamanimaama. Anshat kamachtaku tárangeiya. Ashiri kamankush kurakaa tángcha. Tapazish pshturanguni, shiyyaa sundarurish zapantam pacharangana, tákchush,

**20** uru kurakshat tsiyantayaru, ¿Mayaamsha siyataati yaktanungirisha watandpun watsiri kaymarangsa? **21** ¿Waashat nda yasashawa? Anshuchin watandpunumandari timbanllizpat arapeetari tsak tsak ashkana anootsee. Mishat, ¿Abimelekarineetsi Jerobosetarinee wip tamaranganaya? Yuwapur Tebesshuchpat tputs waratarangana anpur yaktanungiri watandpun watsiri káyamaratu, kizataa patumbichpat tushishpat pacharangiya. Ashiriya, ¿mayaamsha siysat yaktanungirisha watandpun watsiri kaymarangsa? tákchitaati, shiyhat, Itaru sundarootsintaja pacharangana. Uriyassaa pacharangitamsincha, tángcha, týaru, tsiyatssee kamachtayaru zanganirangiya.

**22** Anshat tsiyatssee kamanimapan naatarangu, Dapiyashhat ashpari yuwa Jowab tsiyatssee zanganirangu anoo kamanirangiya. **23** Anshat kamanku tárange. Anshuchshitisin sundar iyangaz pachamaam wazapanisin shitungartarangusin, iyaatsimari kasimaam waritaranganaya. Itaru, iyhat kizpurtaranguni, waptam kinayaruni, yusur watandpunush pshturanganaya. **24** Yaktash pshtuyarusin, arapeetarisha watandpunumand wach timbanllizpat tsak tsak ashirangsin, shiyyaa sundarurish kizpureewa pacharanganaya. Anshuritam Uriyassaa Hititshuchee pacharangitamsinaya, tárange.

**25** Dapiyhat, Ashiri shiyhat Jowabaa kamaningcha. Tapazee mangish mantsarinllpa. Watam tapazish tputs uru tsipataruwa. Shiyhat arang tuwizpurtangcha. Ashiritaa, arang misangayarus, ashpari izuuru kachingeeras, siyamari

kasiyarus, ksangints, shiyaa kurak táranlltanda, támachcha, tárangya.

<sup>26</sup> Uriyasarinshat wizanll wazaranlee pacharangana anungaz mang' mantsaku taarangya. <sup>27</sup> Anshat kiz wazan kanusaramchu anush, Dapiyhat muchchuree, Natu an kiz yamayarush, nuwap pang'i yushindangi, tárangu, Muchchurshat kizaa Dapiyash pang' yushindarangya. Dapiyhat anoo kiz wizanlleemarisha yamarangya. Sheeru, kizshat mikeeru nlluraa iparnarangya. Itaru, Apanllshat yuwaa Dapiy amb ashirangu anoo nda kis naparangya.

Ashiriya, na kamaneena yuwaa Dapiy Uriyasa a wizanll yamarangu anootsi.

## 12

*Ashiriya, na kamanchintspa yuwaa Natán Dapiyaa nambarangu anootsi*

<sup>1</sup> Apanllshat waanaatsi kuk kamanipani Natánaa Dapiyap napamaam zanganirangya. Natánshat Dapiyash kusarangu tsiyatarangya.

Yaktash tputs tsimbun taaranaya. Min tputs kizpur kurikpani, mishat tputs kizpur pukiri. <sup>2</sup> Kurkirpanshat chin zapan opeejarini wakararnitam taarangya. <sup>3</sup> Itaru, pukirshat tputs minumari opeej wip chinurangya. Waana urkirpat paxanxarangya. Sheeru, amuyaritam chinurangu, waanshutarisha uw kanungarangya. Ashirangu, waanpatasha wip nllurpat ipunarangsin, yuwaatstam katungkana anoostam uwshat katungarangya.

Waamaamsha washunandaritam mangaw waarananaya. Maamaamshat waanshutaritam kirimaz maaranganaya. Ashirucha amb ashirangu, wipaats paz kizaatsi ashiru kapung chinoo chinarangiyi.

<sup>4</sup> Minushshat zar tputs paseekpan paseek-takatssin, kurikpanish pang' kusaranganaya. Itaru, kurikpanshat chinoo opeejaa wakararneetstam pachayaru, paseekpaneem maritamaam pachindarangiyi. Ashirucha, pukireetsshat opeejarini yuwaa minumam karupan chinuru anoo shuchiyaru pachayaru, tputseem martarangiyi, kamanku Dapiyaa tárangeya.

<sup>5</sup> Dapiyhat anoo tsiyatsis mazinarangu kapung kurikpanee tsiyantarangu, Natánaatsshhat, ¿Kaapa zurkush Apanll waana paru átish? itaru, ¿tamamshat tputs an ashtaruree? ¿Mayaamsha pukiree chin pachaka? <sup>6</sup> Ashiri yuwamand ashirangu anumand pukireem tuwapachpa ipunpunar opeej tamapari ashishta, yuwamand tputsee nda nayanirangu itutsirangu anumanda, Dapiy tárangeya.

<sup>7</sup> Itaru, Natánshat, An tputs shiycha. Watam shiy Uriyasarineetsi wizanll itutsirangshawa. Apanll waana Israelchich Apanllirini atiya. Nuw Israelchicheemcha urkar nuwaana wasina ipusarangi. Saularini shiyyaa pachamaam zandarangu, nuw shiyyaa tapachindarangina. Saularinshini zamuchiya, atutana shiyyaa kurakaam ínarangashina. <sup>8</sup> Ashiranguri, shiyyaam Saularineetsi pang' panarangina. Mishat, wizanlleetstam mashindu shiyyaam izanlleemish

panarangina.      Israelchicheetsini, misha Utaáchcheetstam ichingarootssin shiyamari ksutaksha.    ¿Mayaatsi arangeem zandchish?    ¿Wanip nuw shiyaam panarangina? <sup>9</sup>    ¿Mayaamshat shiy nuwaa kuki kapeetarangush, yuwaatsshhat nuw nda zandki anootsshhat shiy ashirangsha?    Yuwaa ashirangish anoo nuw kapung ngatkina.    ¿Mayaamshat shiy Hititshuchee Uriyasarineetsi tupcharangsha?    watam shiy shaana, Waani Amónshuch pachapana átush, zanganirangush, pacharanganawa.    Ashirangsin, shiyshat wizanlee yamarangsha. <sup>10</sup>    Ashiriya, yuwamand shiy nuwaa kuki kapeetarangush, Uriyassaa pacharangush, wizanlee yamarangish, anumand urutamari iparish waanpatatin pachachinllinaya. <sup>11</sup>    Shaantari iparish shiyyaa pachamaam zandchinllinaya.    Sheersin, izanlleetsish yutarit patateersin, tputssha ashpari pangchinllinaya. <sup>12</sup>    Shaantanaa ipishungarush, yutaritshishee payurangitaatish, itaru nuw shiyyaa waneekchuri, tputsirish ichingarusin pangchinllinaya.    Wazareetsiri yasachinllinaya, Apanll átcha, tárangeya Natána.

<sup>13</sup> Dapiyshat, Zuraktishcha, shiyyaa kukish payukina.    Nuw mantsircha Apanllee tayutaritarangi, tárange, Natánshat, Itaru, mangish mantsarinllpa.    Apanll yutaritshishirimandish tsipatspat wanicheeja, ndambari. <sup>14</sup>    Itaru, yuwamand shiy Apanllee kuk kapeetarangush, kapung tatsiyuntarangish anumand yuw iparish na kaneeschiri nllurtayaru, an uru tsipachiya, tárangeya.

15 Natánshat waptam pangup kanapeeranllu, Dapiyhat Uriyasarinshini wizanll iparinarangu, anoo Apanll kapung waneerangiya. Ashirangu, nllur kapung wanguytarangiya. 16 Dapiyhat Apanlee nlluraam kapung masharangu, ambiri marizpatari tsapush tamuru tapeerangiya. 17 Wachinanurshitisin yuw kurakash taarash taarana anshitisin parangusin, putayarusin, ichiyzaksin, uwshat kapung ngatarangiya. Yuwash katungkana anush katungamaam ngatarangitamta. 18 Anshat tsimbun matayaru zar tushiychu, anush nllur tsiparangiya. Nllur tsiparamchu, ksutamapaneeewsha Dapiyaa kamanimaam puniranganaya. Mangush chinarangusin, Nllur ndaturitaa tsiparu, tsiyatkuni iyaa k'kini nda mazinamaam zandarangiya, tárangusin, Ashiri natunashat nllur tsipayanllu, tsiyatkuch ¿ameecheezich? Uru iyaa kapungpari tsiyantachiya, tárangusin, kamanimaam puniranganaya. 19 Itaru, Dapiyhat yuwaas ksutamapaneeew tsiyatkusin, waanpatatin kázamkana anoo parangu, ¿Tamaa nllur tsipayanlltee? átu masharangiya. ¿Natuwa nllur tsipayanll? tárangeiya. Ksutamapanshitisin natunaa tsipayanlliya, tárangeyanaya. 20 Ashiriya, Dapiyhat yuw tsapush tamurangu an chiyzayashat, chumambeeru, watunir min ktuntayaru, kzammashpasha waanaatsi taparambayaranllu, Apanllipsha pang' tsiyatkatu naatarangiya. Apanllpat tsiyataramchu, yusur waptam pangup kanapeeru, katungtsingazshat katungpi átu masharangiya. Anshat katungtsee panarangusin, annaa katungarangshita.

**21** Ashiriya, ksutamapanshitisin masha-ranganaya. ¿Tamasha iparish ndaturitaa tsiparu, shiy iparingazish kapung tanukush, katungtseetstam mangurangsha? Itaru, natshat iparish tsipayarinashat, mapiyshtish chiyzayarush katungakshasha, tárangeanaya.

**22** Dapiyshat, Watam nllur kchitama nuw kapung tanuranguri, katungtsee manguranguri, Apanllpa kapung masharangina. ¿Tamari chiy tputsich yasachich? Apaz amb ashkuri, Apanll nuwaa naynikchu, yusur nlluraa ituyamakchu, atutana ashirangshina. **23** Itaru, natshat nllur tsipayanllu, nuw ¿mayaamaja yusur katungtsee manguchee? Ashkinaareena mangushaparina marchina, ¿ambtaati ashkuri antaati nllur yusur támcheeja? Watam natunaa tsipayanlluwa. Nuw anoom nlluraam kutakuri, amb ashkuri, uwshat ¿antaati yusur kanapeeru, nuwash kuscheeja? Watam pastamamari tsipayanlluwa, tárangeiya.

**24** Anshat Dapiy wizanllpat Betsabeypa wazan kanusaramchusin, yusur wazaranllpat tsiyatarangsin, Dapiy wizanlee ipunarangiya. Ashirangu, nlluraa mireeyaru, kamuz tatsipuranginya. Dapiyshat wipaa sur Saramun ísamaranginya. Apanllshat anoo nllur kapung chinaranginya. **25** Dapiyshat anoo yasarangu, apanllpaneetsshhat kuruzuranginya. Natánshat anoo nlluraa Jedidiya átu ísamaranginya. Apanll nee nlluraa kapung chinakiya, átu tárangeiya.

Ashiriya, na kamaneena yuwaan Apanll Dapiyaa wip waneerangu anootsi.

## 14

*Ashiriya, na kamanchintspa yuwaa Absalon  
yusur Irusarinash taarangu anootsi*

<sup>21</sup> Ashiriya, kurakshat Dapiy waanaatsi wipa Absalonaa yusur Irusarinap taachpa átu, Jowabaa kuruzeeru, Na Absalonamun tsiyatsis yararanguri, natunaa ipareetsi Absalona yusur ningtam yanpushini, tárangu, <sup>22</sup> Jowabshat tsapush tutunllaata sheeru, much tsapush kizpur timuchta sheeru, kurakaatssha wanasis tsiyatarangu, Ichee, nuw mangi kischa, watam nuw nduntaati waritakuri, shiyaa nguti mashiranguri, shiysha anuritam chinakshawa, tárangiyi.

<sup>23</sup> Tárangu, Jowab káyaranllu, Guesurap Absalonangaz yanpukatu naatarangiya. Absalonaa yamayashinu, Irusarinash yushindarangiya. <sup>24</sup> Itaru kurakshat, Nuw anoo tputs nda pamaam zandkina. Waani pangpitam kanapuchpa, kurak tárangu, Absalonshat waptam pangup kanapurangiya. Itaru, nda waparee wach parangiya.

<sup>25</sup> Absalonshat wanuts kizpur wanasisimuna. Wamari ichingaroom kasiru taarangiya. Ashim tputs wanasisirini Israelchich ndunarisimuna.

<sup>26</sup> Muchshat wazuranimuna. Kapung muntarangiya. Ashirucha, ichingaru masach muchoo kturtariya. Minum masach tushiykchu, muchoo kturta, kturta ashtariya. Anshat much tsimbun kil taarangiya. <sup>27</sup> Wipshat tuchip kamuz taarangiya. Kizshat minumta. Wip kiz sur Támar kamasinari kizpur wanasisimuna.

**28** Absalonshat anshuri Irusarinash tsimbun masach kurakash nda pakchiyam naptariya.

**29** Ashirucha amb ashirangu, Jowabaatsshhat masharangiya. Nuwaam tsiyatanda. Nuw kurakash napamaam zandaktana. Shiy kamaningcha, tárange, Jowabshat ngatarangiya. Anumun yusur tsimbunarinhitini Jowabaa masharangiya. Jowabshat yusur ngatarangiya.

**30** Ashirucha, Absalon Jowabaa kamachtaku, xapoorangu, kapung tsiyantarangu, muchchureetsshhat kamachtarangiya. Jowab mazar nuwanungiri taariya. Anush sebaadaa zapan tatsumiriya. Amb naateerus, sumaspat tirooyarus ksashinints, tárange. Muchchurshat ayu tárangusin, Jowabaa mazar tirooranganaya. **31** Jowabshat anoo parang, anuritam Absalonangaz tsiyatkatu kusarangiya. ¿Mayaamshat shiy m'chachurish nuwaa mzari sumaspat tirooranganaya? tárange.

**32** Absalonshat, ¿Mayaama nuw kurakpat tsiyatpi túri, kamachtaki anoo shiy ngataksha? Kurakash nuwaa kuki nda wayaksha. ¿Mayaamanaa nuwaa shiy Guesurash tsap yamarshinsha? Watam kurak nuwaa pamaam nda zandkuwa. Ndunnaari ashiru, na ambiritanaaparee Guesurash tsap kis taarina. Ashireeja nuw shiyaa, Mashanda. Nuw kurakpat tsiyatpi átana, átat ashki. Wandaya nuw kurakaa tayutaritaranguri, ashiriya kurakaa, Pchangi, tángcha, tárange.

**33** Jowabshat ayu tárange, kurakash kuseeru, Iparish Absalon shiyapat tsiyatamaam zandkiya, tárange. Ashiriya, Dapiyshat, Yamashini, týaru, kamachtarangiya. Absalonsha Dapiyash

kusarangu, much tsapush kizpur timuchta ashirangu, Dapiyhat putayaru ishambarangiya.

Ashiriya, kamaneena yuwaa Absalon yusur Irusarinash taarangu anootsi.

## 15

*Na kamanchintspayuwaa Absalon waparee kurakaa Dapiyaa kapeetamaam zandarangu anootsi*

<sup>1</sup> Zapishtshat, Absalon kapaachoo zapan paxanxarangu, misha pshiyrshishee minamtam tapazpanim yarangu, ksutamapanee 50 sundar yamayaru, anpat xiyarangiya. <sup>2</sup> Sheeru, puturi shitungeeru, yaktanung wach ngootsinungiri kuxinarangiya. Tputsshitisin kurakangaz, Nuwaam k'kuzeem yaramaam istanda táni, atusin, yaktash pshtukchinllina anoo uwshat taxarayaru mashtariya. ¿Yapimandshat yakat káyashinus naatarantss? tákchu, uwshtisin, Iy Israelchichtanicha tputsini. Tsiyatssee yaanpatatini yaramaam zandkiniya, tákchusin, <sup>3</sup> Absalonshat, Yuw átis anoo tsiyatsis yaramaam kizpurcha wanasiya. Itaru, kurakshat anoo tsiyatsis yaramaam uw tsiyatash wanindaja. ¿Chakaja siyaam istayach? <sup>4</sup> Nuwaannaariya nish tsap kurakaam kinayaruri, uru siy yuwangaz zandkus kuskis, anoo ichingaru nuw siyaam istachina. Tsiyatsseemtam yaramaam siyaam istachina, tárange. <sup>5</sup> Ashirucha, tputsshha Absalonaa pakchusin, tsapush much timuchta ashiranganaya. Absalonshat tputsee paxaneeru ishambarangiya. <sup>6</sup> Ambiri yuwaa Israelchich kurakangaz, Nuwaam k'kuz yaranda táni,

atusin, kuskana, anuwaa uwshat ambiri tåtaa, tåtaa ashirangu, Israelchichee mango mamarparangu, zapan tamapingarangiya.

**7-8** Ambiri ashishtar ashku, Absalon ipunpunar masach taachu, anush kurakaatsshhat waparee tsiyatarangiya. Apaa, nuw Hebronap napatama, átana. Nuw yuwapur Guersuramand ningeem naatarangi anpur, Apanlleetssha, Apaa, Irusarinash nuwaa wayakchush, nuwsha shiyaam Hebronash mach opeejareetsi muchchima, tárangina. Ashirucha, nuwshat anoo izuuru tuminpi aturi, shiyyaa mashkashina. Ashiri nuwma amb pangatama, tárangu, **9-11** Kurakshat ashiri mapiyrush naatatcha, tárangiya.

Absalonshat kamapshiru, tputsee zapan Israelchichip zanganirangiya. Hebronash siyaa yambichima, Absalon átcha, tángtsa. Yuwari wakar wits zunganeeyachu, anuritam siysat zamangata shingtsa. Absalon Hebronshucheem kurak kinayanlliya, tángtsa tárangu, kamachtarangiya. Wipunasheem Irusarinshuchee 200 tputs yamayaranllu, anpat ipuneeranllu, naatarangiya. Itaru, uwshtisin Absalonaa chínash nda pakchiyam yasarsin naarananaya. **12** Absalon, Maachee pachayaruri, Apanlleem ungirtapi átu, Dapiyaa wamachtashi Ahitofelaatsshhat kuruzurangiya wipunasheema. Anshat tputs kizpur yasampanimuncha. Waparee Dapiyaa kizpur istarangitamta. Yakat Guiloyash taarangiya. Amb ashirangu, waanaatsi kizpureem ínarangu, waparish kurakush zamumaam zandarangiya. Ashirucha, tiptsirshat aranginasha pzapanimaam zandarangu, zapan

tputs Absalonash tachitaranganaya.

<sup>13</sup> Tputssha anoo parangu, Dapiyatsshatsiyatssee kamankatu, naatarangiya. Kamanku tárange. Absalon Israelchichee tputs tiptsireem ínayanlliya. Amb ashirangu waanaatsi kurakaam ínakiya. Uwshtisin Absalonaam kapung istamaam zandkanaya, tárange. <sup>14</sup> Dapiyshat tiptsiree ashpari Irusarinash taakana anoo kuruzeeru, Pzaa, suwayani, nda Absalon iyaa pachamaama. Míkintsa. Putanaaparee iyaa kamatkachu, iyaa ichingarootsini m'chitpat pachachiya. Irusarinshuchee tpachingachiya. Paptsa, tárange. <sup>15</sup> Tputssha ichingarusin, Zuraktishcha. Ashiriya, pzaya. Shiyaam kutakaniya. Yuwaa shiy kurakish kamachtakish anoo uru tuminchinipa, tárange.

<sup>16</sup> Amb tárangusin, kurak káyarandsin, ichingaru tiptsirpatari pangusee ksutamapan taakana, anpatari ashpari káchingayarandsin, naataranganaya. Tputs ashpari káchingarangusin, Dapiy wizanlleetsimshat chung mashingamawaa anootsimshat panguseem ksutamaam kasarangiya. <sup>17</sup> Yaktaa shitungeerandsin, kuraksha wipunashpatari tspakatu anush xiyananganaya. <sup>18</sup> Xiyarangusin, anush kurak tiptsir zapan shurangat, shurangat ashiranganaya. Keretewshutshitisin, mishat Peletshuchtamsin kurak tsipasaw ksutamapan taakana anuwatamsin shurangaranganaya. Jetewshuchtamsin 600 sundar Gadaman tsap káyarandsin anshutam shurangaranganaya.

<sup>19</sup> Ashirucha, kurakshat Gadshuchee tputs sur

Itayaas tsiyatarangu, ¿Mayaamshat siy iyash tachitarangtamsa? Siy waptam kanapungints. Siy-naa kurakaa kaneeschee ksutangtsa, watam siy arapichsawa tputtsis. <sup>20</sup> Singiri siy nuwash ksutamaam kusarangus, ¿tamareeja nuw siyaa, Nuwash zurampatari tchitangtsa, tachee? ¿Antaati nuw yap naachini anoo yasaree? Ashiriya, kanapungtsa, nuw siyaa atashina. Tputsriftish naangcha, tina. Apanll shiyyaa kapung chinakiya. Siyaa urutamari wanasisr ksutchiya, Dapiy tárange.

<sup>21</sup> Itayshat, Zurampatari Apanllimun sur, mishat shiyamunatam surish táchinllpa. Yapttaati waritaru, ambtaati naakchush, iyshat ambiritam naamaam zandkiniya. Mantsirimshiptaatiya naakchush, iyshat ambitam tsipamaam zandkiniya. Ashirucha amb atuni, nda kanapumaam zandkiniya. Yaptam naakchish ambitam naachinipa, watam shiyyaa istamaam káyaraniwa, tárangeanaya.

<sup>22</sup> Ashiriya, siyaptatampari washunand naachchi, Dapiyshat tárange. Ashirucha Itay anuritam Dapiypat ipuneerandsin wasundururpatari, ichingaru Dapiy wasundurur machiru anpatarisha washunand yápandayarandsin naataranganaya. <sup>23</sup> Tputsshitin ichingarusin, kizpur tanuranganaya. Tputsimma Sedronaa kung kíteerandsin,\* ushimunsha kurak Dapiy kítarangitamta. Tputsee yamarsin naataranaya. Arangirisha tsap puzap naataranganaya. <sup>24</sup> Itaru, Sadokshat Leviychchpatarta, uwshtisin Apanlee kajonarini kumpani Irusarinnung watandpun

---

\* **15:23** Wanga 18.1 tsiyatsis nipta tatsamooru taaritamta.

natumasa kutaranganaya. Tputs ichingarusin shitungeerandsin, uwshtisin anshutamsin tachitaranganaya. <sup>25</sup> Itaru, kurakshat Sadokaa, Shiyhat Apanllee kajonarini yáyarush, wapitam wayangcha. Wandaya Apanll nuwaa istaku, yusur kanapkachuri, anshuri Apanllee kajonarini yusur pangchima. <sup>26</sup> Itaru, Apanll nduniya nuwaa wanasis napku, waana zandku, nuwaa ashtachiya, Dapiy tárangeiya Sadokaatsi.

<sup>27</sup> Mishat, kurakaa Sadoka apanllpaneetsi tárangeitamta. Mazinangcha. Siysa Abiyatarpat ipuneerush Irusarinap naangtsa. Iparpatis Ahimaaspat, mishat Jonatanpat naangtsa; tsiyatssee kamanimapaneem taangtsa. <sup>28</sup> Itaru, nuwshat watandsash taachima. Anush tsiyatssee yasamaam kutachima, tárangeiya.

<sup>29</sup> Sadokshat Abiyatarpat Apanllee kajonarini yáyarandsin, waptam Irusarinap kanapuranganaya. Ashirangsin, anshurisha taaranganaya. <sup>30</sup> Anshat Dapiy Olivos machip káreerandsin, Dapiy kapung tanurangu, spatshari naatarangu, muchush tsarunpat tpararanginya. Ichingaru wasundurur tanuksin, ambitam ashirangtamsinaya. <sup>31</sup> Anushshat, Dapiyaa tputs kamaniranganaya. Ahitofel kapung istakiya Absalonaama, tárangeiya. Dapiyshat anoo mazinarangu, Apanllee tsiyataranginya. Apaa, yuwaa Ahitofel Absalonaa mangoo p'tsimaam tsiyatku anoo shiyhat tayutariteerush ksangcha, tárangeiya.

<sup>32</sup> Táyaru, yuwamunari mach tsparatu, Apanlleem tsiyatkana anush kuseeramchu,

Husayshat Arkitaschich tputs anshutam Dapiyangaz kusarangiya. Wamar izichimaw, muchumunshat tsarun yásimbaru, naantach ashirangiya. <sup>33</sup> Dapiyhat parangu, Shiy zuwaa, nuwash tachitkachush, nuwaatshapa xarashish wayachsha, watam kizpur wachinshawa. <sup>34</sup> Nda ashimaam shiy waptam Irusarinap kanapunlla. Absalonash napeerush, Kurakaa, nuw shiyya istachinllpa. Nuw sirú apareetsish mangoo p'tsimaam istaranguri, natsha shiyya wanarisitam istachinllpa, tángcha. Amb ashkachush, yuwaatsinaa Ahitofel mangoo p'tsimaam tsiyatku anootssha shiysa tayutaritachpasha. <sup>35</sup> Mishat, amb kuseerush, apanllpanee Sadokaa, Abiyataraatstam pangachpasha. Pakeerush, yuwaa Absalon tsiyatku anoo kamanimachcha. Uwshtisin siyaa istachtamparee nuwaa kamanimaama. <sup>36</sup> Wip Ahimaas amb taaritamanaya. Jonatantam anshutamta. Anush ichingaru shiy kamaningcha. Uwshtisin nuwash tsiyatssee waychinillinaya, Dapiy tárangiya.

<sup>37</sup> Husaysha Dapiy wamkur waptam kanapeeranllu, Irusarinash kuskamchu, Absalonshat yaktash washitungash pshtutaa ashirangiya.

Ashiriya, na kamaneena yuwaa Absalon kurakaa Dapiyaa kapeetamaam zandarangu anootsi.

## 16

*Ashiriya, na kamanchintspa yuwaa Dapiy izuru suwayaru, Absalonsha waparish zamurangu anootsi*

<sup>1</sup> Dapiysha machee pakich arangiri naanata sheeranllu, Sibaatsshhat chamayangaranginya. Sib Mefibosetcha muchchuri. Uwshat káyaranllu, pangati átu, tsimbun burru yamayaranllu, anamun katungatsshhat 200 panga, mishat kizaruntam mayapshim 100 taxaptam, mishat wanuspasaru 100 kizarun pusam, mishat vinootstam maachtash tas tatsitam aship tuchipayarandsin, kurakash yushindakamchu, <sup>2</sup> kurakshat anoo parangu, ¿Mayaamshat nee payutaranllsha? tárange. Sibshat, Nee burru nuw yuwash kurak wip naachinllina anoomcha. Pangaatsshhat mishat wanuseetstam sundaroom watungash yushindarangina. Vinootsshhat yuwaam apusap naatarandsin nizitssin sachitambachinllina anoom waamaam yushindarangina, tárange. <sup>3</sup> Kurakshat, ¿Yapinaaree paturunarish wachinllinoo? tárange. Sibshat, Ambiri Irusarinshuri taariya. Mangush chinrangú Israelchich tputs nuwaa kurakaam ínachpasinaya. Watam pachiri kurakamunawa, tárange, anshuri Irusarinush kutariya, tárange. <sup>4</sup> Dapiyshat, Sibaa, na nimand yuwaan nuw Mefibosetaam maachtaa panarangi anoo shiyaamshat panachinllpa, tárange, Sibshat, Zuraktishcha. Nuw uru shiyaam kurakareemi istampán táchina, tárange, tsapush timuchta ashirangya.

<sup>5</sup> Dapiy Bahurimashsha tsap kuskamchusin, Saularinsha maachiri Guerá wip sur Simiy anush taaru, anshat Dapiyaa parangu, kapung natsarangu, tsiyatku, yutaritaam ínarangya. <sup>6</sup> Natsaku, patumbichpa tiyá, tiyá

Dapiyaa, wasundurureetstam ashirangiy. Ashirucha amb ashirangu, wasundururshitisin urkaree pachindkusin arang, arang sheersin kámanaranganaya, nda tiyá ashimaama atusina.

<sup>7</sup> Anshat tputs sur Simiy natsaku, Dapiyaa, ¿shiy ning tamakatshasha? Pachampanish tputsish yutarittish. <sup>8</sup> Shaanamandari shiyya Apanll waneeku ashiksha. Yuwamand shiy, Nuw kurakaam kinapi átush, nuwaa maachiriti Saularineetsi tupcharangish anumand kiyung kachiykisha. Itaru, natshat Apanll ipareetsshitish kurakaam ínayanlliya, anoom tsap ksutamaama. Na shiyhat shaanamandari kiyung kachiykush taatsha. Shiy pachampantishcha tputsish, tárangeiya.

<sup>9</sup> Abisayshat Seroyerini wip anoo mazinarangu, uwshat, Kurakaa, ¿Mayaamshat in tputs nda waritaru tumuz tsipar tamapari ashiritaa shiyya kurakaatsish tamundakcha? Nuwaam ksanda. Nuw muchoo turuyaruri kasachima, tárangeiya.

<sup>10</sup> Itaru kurakshat, Nda watsta amb tárinllpa. ¿Antaati shiyyaatseeja muntak? Apaz Apanll waana nuwaa tayutaritamaam kamachtaku ashkusina. Ashiri chiyhat ashima tsiyatkuch, ¿ameecheezich? Waana Apanll kamachtaku anootsee, tárange.

<sup>11</sup> Abisayaa mishat wasundurureetstam wanasir waneerangiya. Watam nuwaa ipartaati pachamaam zandkuwa, ashiri waanipari Benjaminchich tputs nuwaa pachachindanaya. Ksangasinda. Waani pachapanda, watam waana Apanll anoo kamachtaku ashkanawa. <sup>12</sup> ¿Apaz Apanll yuwaa kiyung kachiykachi anoo pakchu, yusur nuwaa naynikchu, ndushat yutaritshishee

nuwaam wayachiya? Itaru, nuwaatsshaparee kapung istachiya, tárangiya. <sup>13</sup> Dapiy tiptsir ashpari yusur anoo kasayarandsin, minupshat mach naataranganaya. Simiyshat ambitam tachiteeru, machish Dapiyamunari arangiri patumbichpa tiyá tiyá ashirangu, tsapuptatam tachuyaru kuruta, kuruta ashirangiya. <sup>14</sup> Dapiyshat ichingaru tiptsirpatari Ortagamun wing napiwaranganaya, anootsirishat kapung nizirangsin, kanuskusin, shanee ashiranganaya.

<sup>15</sup> Itaru, Absalonshat Ahitofelpat mishat muchchurtamsin yuw tachitarangana anpatari ashparitssin yaktashurishat Irusarinash pshturanganaya. <sup>16</sup> Itaru, Dapiyshat wamkur Husay Arkitaschich anoo parangu, Absalonnung wátsiri káyamayaru kapung tsiyatarangu shambatampat, Kurakaa, shiy urutamari kurakarush taatsha, tsiyatku táta táta ashirangiya.

<sup>17</sup> Absalonshat tsiyatarangu, ¿Tamashat Dapiyaa amikureesha nda amikuripish kutakatush tachitasha? tárangiya.

<sup>18</sup> Husayshat tsiyatarangu, Aparshish tachitamaam izuuru pinasakina. Apanll shiyyaa kurakaam ipusarangu, Israelchich tputs ichingarusin shiyyaa kurakaam ínarangusin, ¿tamareeja nuw shiyash nda tachitchee? <sup>19</sup> Mishat, kurakaa, táchinllpa. Nuw amikureetsi kapung istaranguri, natunaa nuw shiyyaa aranginasha Dapiyatseerush wipish ishtachinllpa, tárangiya.

<sup>20</sup> Absalonshat anumun yusur Ahitofela masharangiya. Mazinangcha zuwaa. ¿Mayaa

mangishish chinaksha? Yuw chinakish anoo nuwaa kamaninganda, tárangu.

<sup>21</sup> Ahitofelshat, Aparish wizanll mashingamaw pangoo ksutamaam kasarangiya. Ashiri aparshish wizanll pshtuyarush maangcha. Amb ashkachush, Israelchich ichingarusin yasakchusin, waparee tayutariteenllcha, táchinllinaya. Tákchusin, yuw shiyash tputsirish tachitarana anin kapung mang' ksachinllinaya, tárangya.

<sup>22</sup> Maasheemshat pangus kapungush yuwar wanupship wayaranganaya. Amb yuwar Absalon waparpat wizanll mashingampa maaranganaya. Anootsshhat yuwaa waparee wizanll mantsir patatarangu, anoo ichingarusin Israelchich paranganaya.

<sup>23</sup> Anpurshat zar Ahitofel uru Apanllee kuk kamanimapanpaz ashiru taarangiya. Ashirucha amb ashku, anumandari Dapiy anumun mang' taturangiya. Absalonshat anumuntam mang' taturangiya. Ahitofelamari wamari kasiru istama-paneem taarangiya.

Ashiriya, na kamaneena yuwaa Dapiy izuuru suwayaru, Absalonsha kurakaam waparish zamurangu anootsi.

## 17

*Ashiriya, na kamanchintspa yuwaa Absalon  
Ahitofelaa kuk ngatarangu anootsi*

<sup>1</sup> Ahitofelshat Absalonaa tsiyatarangiya. Nuwaam sundarurish yuwanandari kizpuri anunandari 12 mil ipuseerush, pananda. Anpat naturitam psaan Dapiyap tachiteeri pangatama.

<sup>2</sup> Watam arap naataranganawa. Ashiriya, na sambaytachpasinaya. Nuwshat tachitayaruri, yuwash sambaytachinllina anush kuseeri, tpuxtaruri, ichingaroo tiptsiree tusuwayaruri, apareetsimtish pachatama. <sup>3</sup> Anumunsha, nuwsha tputsee ichingaru shiyash tachitamaam tsiyatchima. Shiyaa tatsuyayarusin, kissapa shiyash tachitchinllinaya. Kiz kaneesich yamaam tamatarparee ashiru shiyash kis taachinllinaya. Minamari tputsee pachayaruch, kasachchi. Ashkachuch, tputs ichingarusin mapiychinllinaya, tárangiya.

<sup>4</sup> Absalonshitisin, mishat anshuchtamsin Israelchish, ashchiri, Amb shingsi, tárangeanaya.

<sup>5</sup> Itaru, Absalonhat, Arkitaschichee Husayaa yasapi. Uwshat ¿mayaja chinach? tárange, kuruzurangiya. <sup>6</sup> Husayhat Absalonash kusarangu, Absalonsha, ¿Shiy may mangishish chinaksha yuwaah Ahitofel átu anootsi? ¿Shiy amaksha? tárange.

<sup>7</sup> Husaysha, Ahitofel tsiyatku an kaapa wanasireeja. <sup>8</sup> Shiy apareetsish yasaksha. Kizpurtanda. Wasundarurshat kizpurinan-daritam taaranaya. Manginshuchee chaniwa wip putayaruch, wipangaz kapung tsianataru ashirusin na shaneeranaya. Mishat, Aparish kapung tapazish xapshingama. Waanung tputs psaanta káyamamaam ndunari. <sup>9</sup> Natshat ¿yapimasaja taariya? Wachushpari tapishuru tsangariya. Nda ashku piyamazuwa tapishuriwa. Wapaz ambshat ashiru, anush sundarureetsish zapan pachakchu, yutarit shitungchiya. Tputsshitisin anoo mazinakchusin, mang' kzuw ashkatssin, shiyaatssha mikeersin

kasachinllinaya. 10 Sundarurish kizpuritaa taaku, kuwitsam watsiyun ashiritaateesinaya, itaru uwshat anoo tsiyatsis mazinakchusin, suwasuwachinllinaya. Ichingarusin tputs, Israelchichtamsin yasakanaya aparish yuwaashtaru anootsi.

11 Nuwaana shiyya wanasir wanichinllpa. Nish tsap Israelchich taakana anoo yambiyarush, wanasir tsiyatangi. Yakat Danpatari Beersebamun yakat kuruzungi. Aship ashkachush, sundarurish marimun wing mazach wasipur taataru aship shaana imachingcha. 12 Ambinaapa sheeruch, apareetsish pakchuch, yapimasaja tapishuriya, anoo izuuru ashchiri katiripeeruch, sirin tsapumun xuwatkachu ashchiri kanachitaru sheerush, shiyamari kasitsha. Amb ashkachuch, wasundurur nda minumtiyam kamungchinllinaya. Izuuru kachingeeruch, kasachchee. 13 Wandaya yaktash kamungamaam pshturanginaariya, iy Israelchichini waskaa zapan yáyaruni, patumbchee ichingaru tusic tusic ashkachuni, izuuru wazawap kapeet kapeet ashtachinipa, Husayari tárangeiya.

14 Absalonshat ichingarusin Israelchichtamsin Husayaa wayash chinarangusin, Ashiri ambinaa sheeni. Ninacha Ahitofelmand wanasir tsiyatkasha, tárangeanaya. Apanll waana chinarangu, Absalon waanaatsisha tayutaritap átu, yuwaas Husay tsiyatku anoo kis payurangiyia. Itaru Ahitofelaa kuk ngatarangiyia. 15 Husayshat apanllpanee Sadokaa, mishat Abiyataraatstam tsiyatarangu, Ahitofel Absalonaa ichingaru

Israelchicheetstam, Pza piy sheeruni, Dapiyaan pachani tárangeya. Itaru nuwshat Absalonaa tamapingaranguri amb shirintspa, anoom zandkus piynaa shingints nguti tárangeina. <sup>16</sup> Ashiri siysat naturi teet sheerus, Dapiyaam kamanishinints. Neetsiri maarintspa arachich Ortagaa kung kitangints tángcha. Ndunnaa ashkush, uru neetsiritanda tputsirpatartish shiyaa pachachinllina tángcha tárangeya.

<sup>17</sup> Jonatanshat Ahimaaspas apanllpantamsin wasina kutaksin kung tipashish sur En-rokel taarangu annungiri shanee ashiranganaya. Yaktash pshtukchuni, tputs paruneepa atusin ashiranganaya. Tputsshumshat muchchur kizash kamasinash Sadokash wip tsiyatssee wayarangiya. Sadoksha wip, Kamaniti Dapiyaatsi átu naatarangiya. <sup>18</sup> Nllurshat kanungas shitungeeranllu, naantachu, kizaa parangiya. Ashirucha, Absalonapshat teet sheeru kamanirangiya. Jonatanshat Ahimaaspas anoo mazinarangusin, Papcha, paruneepa, tárangeusin anuritam teet ashirangsin, wamkurip Bahurimap pang' kusaranganaya. Anushshat kuseersin, kung tipashish tsap ktsimash wantsush pshtuyarusin, tapishuranganaya. <sup>19</sup> Anshat tputs wizanll washtangasheem tinayaru, anpat wachoo shtandayaru kasarangiya. Sheeru anumunshat, tirikpashat zap washtangashimun iwaz kuruteeru, ashchiri puyaru kasarangiya. <sup>20</sup> Anushshat, Absalon wasundurur kusarangsins, anshuchee kiz masharangiya. ¿Shiy partatish Ahimaasaatsi, mishat Jonatanaatstamta? ¿Yapeeja naayanllina? tárangeusin, kizshat, Neetsina

tushiyaranllusincha kungup piy naatarangana, tárangiya.

Absalonshat wasundurur amb nachungaksin xapooyerandsin yusur waptam Irusarinap kanapuranganaya. <sup>21</sup> Kanaputaramchusin, apanllpanshitisin Ahimaas, mishat Jonatantam kungush tipashshish shitungarandsin, Dapiyapshat kamankatssin, teet ashiranganaya. Anshat Dapiyash kuseersin, kamankusin táranganaya. Papcha shiy suwangi, naturi mikeerush Ortagaa arachich kitancha. Ndunnaa ashkush papcha. Ahitofel Absalona, Pza kamateeruni pachani týasintanda shiyaatsi, táranganaya. <sup>22</sup> Ashiriya Dapiyshat anuritam psaanari tiptsir ashpari Ortagaa arachichshat mikimari kitaranganaya. Putam zar tputs kachingamshat ashirangiya.

<sup>23</sup> Ahitofel Absalona piy sheeni átu xapooyeru, anumand kapung tsiyantayaru, burrurimunini ush kuxineeranllu, waanpeetam pang' Guilbowap naatarangiya. Anushshat yuwash nlluratarangu anush kuseeru, maachiritaa ashpari tsiyatam yuwipayaru, waanaatsi wayarpunish spuyaru tsiparangiy. Tskiparamchu yaptam waparina mapurangana ambitam mapuranganaya.\*

<sup>24</sup> Dapiyshat naatarangu, Majanayimapshat yakat kusarangiya. Absalonshat ambitam tachitaru, wasundurur Israelchich ashpari Ortagaa kung kitaranganaya. <sup>25</sup> Anpurshat sundar urkar sur Jowab kizpur tapazee

---

\* **17:23** Matiwa 27.3-10 tsiyatsis nipta tatsamooru taaritamta.

waratamaam yasarangiya. Itaru, anootsshhat Absalon, Shiy watsta, tárangu tashitungayaru, minootsshhat Ismaelchichee Itráy wip Amasaya sundaroom urkar ínarangiya. Itráyshhat Najasa wip Abigayilaa yamarangiya, Sarve muna. Sarveetsshhat Jowab waniri.

<sup>26</sup> Absalon Israelchichpat tachitarusin, Galaadash tsap kusaranganaya. <sup>27</sup> Itaru, Dapiyshat Galaadanung tsap Majanayimash yakat kusarangu, anshuchshitisin Naja wip Amónshuch Rabaa yanungamarini sur Sobi kis Dapiyaa chamayangarangiya. Lodebarshuchshat Amiyel wip Makir chamayangarangitamta. Galaadshuchshat Rokelimshuch yakat Barsilay sur chamayangarangitamta. <sup>28</sup> Tuchpisin chamayangakatssin, tiptsireemtam maash wirmaam, mangawatam kapungumash, suwitam, mishat katungtsitam tirik, sebaadatam, wach wasipuritam, maachtatam kpichim, yamarunltam, mikatam pakchimash, <sup>29</sup> kinduratam, wakaratam mimir minam, opeejatam mimir minam, aship an yáyarandsin Dapiyaam mishat tiptsireemtam watungash yátaranganaya. Mangush chinarangusin, apuspimand tsap naatarandsin, kapungpari niziranganaya, mishat maritzam, sachistam kayateenllpasinaya, tárangusin zapan katungats yátaranganaya.

Ashiriya, na kamaneena yuwaa Absalon Ahitofelaa kuk ngatarangu anootsi.

*Ashiriya, na kamanchintspa yuwaa Absalonar-  
inee pacharangana anootsi*

<sup>1</sup> Dapiyarini wasundururee tâcheeru, milosh sundar yuw kizpur kurakaa anoo ksutamaam wayarangiya. Anshuritam 100 sundar ksutamaam yuw tsipas kurakaa anoom wayarangiya. <sup>2</sup> Sheeru, wasundururee tuchip chawpishtayaru, zanganirangiya. Minam chawpishtarangu anoo kurakaam Jowabaam ksutamaam kamachtarangiya. Tsimbunarnishhat chawpishtam kurakaamtam Jowabaam zoonll Seroya wip Abisaya ksutamaam kamachtarangiya. Tuchparinishhat chawpishtam kurakaam Gadshucheem tputs Itayaam sur ksutamaam kamachtarangiya. Aship sheeru, Dapiy wasundururee zangankachu, Itaru, nuwaptatampari naachchi, tárangiya.

<sup>3</sup> Wasundarurshitisin, Nduni. ¿Mayaamaja shiy amb naachish? Shiynaa neetsiri taarapcha. Yaanitari naachinipa. Kundararish shiyaatsinaa sundarurish kaapa nda pachamaam zandkanaya. Apaz kundararish shiyaatsshhat pakchusin, uru shiyaatsimari pachachinllinaya. Iysha suwakchuni, ndusha iyangzina tachitchinllinaya. Iyaatsinaa 10 milootsini tputsini nda pachamaam zandkanaya. Itaru, shiyaatsimari pachamaam chinakanaya. Shiyaatsimari pachakchusin, kapung mang' ksaksin 10 milootspaz sundar pachayarusina ashtachinllinaya. Anoomcha shiyya neetsiri taarapcha, tâshiniya. Sundar iyaam pishtakinaariya, nimandari shiyya tputsee zanganitsha, táranganaya.

<sup>4</sup> Dapiyshat, Zuraktischa. Ashiri nuw neetsiri taapama, tárangu, yaktaa washitungash piyam ngootsee ktapuz xiyarangiya. Ashirangu, yuwshat milosh tputs minum kurak kizpur wayaku, anshuritam 100 sundar tsipas kurak wayaku ashirangu, anshitisin naakchusin, shitungaranganaya.

<sup>5</sup> Dapiyshat Jowabaa, Abisayaatstam, mishat Itayaatstam yusur tsiyatarangiya, yuwaat tuchip kurak kizpurinand naakchinllina anootsi. Nuwaat chinakinaareesa, kaapanaa ipareetsinaari Absalonaa pcharintspa, tárangiya, Sundarshitisin ichingarusin yuwaat Dapiy wipaa pachamaam pachindarangu anoo mazinaranganaya.

<sup>6</sup> Dapiy wasundurur Israelchicheem pachakatssin, Efrayinarinpini watsapun naataranganaya. <sup>7</sup> Anushshat, Israelchichish pshturangusin, Dapiy wasundurur zapan Absalonaa wasundurur pacharangusin, washunand 20 mil pacharanganaya. <sup>8</sup> Anshat waanpatatin waratarangsin, tputs zapan manginash tatsitarangiya. Ashirangsin, manginash zapan tsiparangusin, machinsha waanpatatin m'chitpa pacharanganaya. <sup>9</sup> Absalonsha kapaachumun muúlamun kuxinaranllu, naantach ashirangu, yap nda chinaru anush Dapiyaa wasundurur chamayangarangiya. Anoo puniku, muúlshat piyamshat manginap teet ashku, mantsirishshat pshtukamchu, Absalonshat much yasinash wapzar sarichirangiya. Ashkachu, muúlshat arang teet ashku Absalonaa anshuri tsharangiya. Ashirangu, Absalonshat anshuri much saricheeru, yuwarshat kambiptaramach

ashirangiya. <sup>10</sup> Sundarsha anoo parangu, Jowabaatsshhat kamanirangiya. Absalon yasinash much saricheeru, yuwar kambiptarpa, mang tárangeiya.

<sup>11</sup> Jowabshat mazinarangu, Ashiriya, ¿mayaamsha nda anuri pareesha pachayarush kasasha? Ashkinaareesha, nuw mangi kisparee. Yuwamand pacharangish anumand nuwshat shiyaam kurikee 10 mbammash yáyaruri, mishat kichpushitam yuw kizpur wanasirimshi anoo panachinlla, tárangeiya.

<sup>12</sup> Itaru sundarshat, Nuw ¿tamari kurakaa kuk mazinanlluri, amb nuw ashtachee? Watam iy ichingaruni yuwaas Dapiy shiyaa, Abisayaatstam, mishat Itayaatstam, Nuwaas kuki mazinangtsa. Ipareetsinaari Absalonaapchamanaa pcharintspa, tsiyatku, tárange, anoo mazinaranginiwa. Ashirucha, shiy nuwaam zapantaati kurikee 10 miltaa mbammash panakush, nuw anoo nda ayu táchina. <sup>13</sup> Nuw pachakchinaareena, kurakshapa yasakchu, nuwaatsshhat kamachtachiya. Pachayarush ksangcha, tákchu, shiyatamshat nuwaas pachatsha, tárangeiya.

<sup>14</sup> Jowab anoo tsiyataramchu, ¿Mayaam anoom ngutish tsiyatstapich? Pzaya, Ashtaa, pachayani, týaranllu, naanataa sheeranllu, wandaritam much yasinamun wapzar sarichiru, kambiptaru parangiya. Ashiriya, uwshat turuwpat mangoo tuchip kayungarangu, Absalonshat nda musá tsipaku, anuritam kchit kambiptar ashirangiya. <sup>15</sup> Yuwshtisin Jowabaam istampan tachitarana, anshitisin izuuru pachayarusin, kasaranganaya.

**16-17** Anshat pacharamchusin, Absalonaa wanuts yáyarusin, manginapshat mantsirish tsap wach kawaru anush tapshuyarusin, anumun patumbichpashat wachoo kámanayarusin, kasaranganaya. Sheerandsin, Jowab tiptsiree kukunamaamshat kamachtarangiya. Anumandarishat, Israelchichee ndushat arang tachitarangsin, watam Jowab watsta tárangeuwa. Israelchichshitisin anoo mazinarangusin, kapung punirangusin, waptam pangup suwaranganaya.

**18** Absalon kchitama, waama mapshissheem tinamaam tputsee kamachtarangiya. Kurakash mapshini tinarangiya. Kizpur wanasis tina-yaru, waanaatsi sur anumun yandarangiya. Wip nduneeru, sur minamari yandarangiya. Wandarit anush pshkuru pataraniya. Itaru, uru kurimunaz taakiya.

**19** Sadokshat wip Ahimaas Jowabaa tsiyatarangu, Nuw shiyya mashkina. Nuwma kurakap teet sheeri kamanitama, Apanll wizpurpat na kundarareetsish tachiyarangiya, tátamasima, tárangeuwa.

**20** Itaru Jowabshat, ¿Antaati shiy anoo kamanimaam waritarish? Nda. Minushparee zar shiyyaam kamanimaam waritachiya, watam na kurak wip tsiparanguwa, tárangeuwa.

**21** Ashiriya, Jowab wasundurureetsshat Etiyopee kuruzeeru, Shiynaa yuwaa nish ashpari parangish anoo kurakaa kamanishini, tárangeuwa. Etiyopshat anuritam kamankatu kurakap iripurangiya.

**22** Ahimaasshat yusur Jowabaa masharangiya. Ashtaa, nuwshat Etiyopimun ush tachiteeruri

pangatama, tárangu, itaru Jowabshat, ¿Shiy mayangazshat amb naamaam zandaksha? ¿Tamatí átshasha? ¿Ambtaati naayarush mayshtaja yáyachish? tárangiya. <sup>23</sup> Ahimaasshat, Ashiritaata, napatama, watam nuwaantari napamaam zandkuri tinawa. Ashiri napachtandi, tárangu, Jowabshat, ¿Tamanda? Naamaam zandkush, napashini, tárangiya.

Ashiriya, Ahimaasshat anuritam tándsapiri iripurangu, Etiyopee arangeem kaneeru imazarangiya. <sup>24</sup> Dapiysha iwanung yakat washitungash tsimbun wach kawaru annung apusash kuxinxinaw ashirangiya. Yaktaa washitungash ksutamapanshat tandapunuzimun yuwar kuxinxinawu, napanapaw ashirangu, tputs arap minamari káyashinu iripeeshinu, anoo parangiya. <sup>25</sup> Anshat paranllu, kurakaatsshhat, ¿Tamaki tputs ashtar? Minumari káyashinu iripeeshinsha, tárangiya. Dapiysha, Minumaritaya káyashinu tsiyatsis wanasisrtanda payuru shitaranllu, tárangiya. Anshat yuwaa tputs watsiritataranllu anoo, <sup>26</sup> yusur ksutamapan arang nap ashku, mishat tputs minamtam káyashinu iripeeshinu parangiya. Anootsshhat parangu, yusur kurakaa, Min anuwaa tputs arangeem minumtam káyashinu iripeeshinu, tárangiya. Kurakshat an tputs nda mangu naanllpa. Tsiyatsis wanasisritamtanda payuru naanllu, tárangiya.

<sup>27</sup> Ksutamapanshat parangu, Yuw imazaru naanllu anu Ahimaascha Sadok wipaya, tárangiya. Kurakshat Ahimaas tputs wanasicrha. ¿Tamama

tputs tsiyatssee wanasirimash payuru kusach?  
Napa: Nuwangzimari kamaniti átu naatiya,  
tárangeiya.

**28** Anshat Ahimaas kurakash kusarangu,  
kurakanung wats tsapush tutunlltayaru, much  
timuchta sheeru, Apanllimari kizpurcha. Shiaya  
chinarangu, na kundarareetsish waamari  
kasirangya, tárangeiya. **29** Dapiyshat, Wanasischa.  
¿Natuwa? ¿Iparshitinawa? ¿Absalona na tamara?  
tárange. Ahimaasshat, ¿Mayaatsimasaja? Jowab  
nuwaa ningeem tsiyatsseem kamanimaam  
zangankachu, anshumaritcha ningeem  
naakchuri, zamangarandsin mazinanshina.  
Itaru, nuw nduntam yasarina. ¿Mayaatsimasaja  
táranllina? tárangeiya.

**30** Kurakshat, Neetsiri piyam xiyangimasi,  
musápa, tárange, Ahimaasshat ayu tárange,  
anootsiri piyam xiyeeru kutarangya.

**31** Anshat musásiritam Etiyopshat iriputaranllu  
kusarangya. Kurakaatsshhat, Shaana  
tputsirish tsiyatssee shiyaam zanganeeru,  
anoo shiyaam kamankatina. Apanll shiyaam  
kapung istarangya. Yuwamand shiaya  
kundararish kapung natsamaam zandarangana  
anumand Apanllshat kapung anshuchee tputs  
waneerangya, tárangeiya.

**32** Dapiyshat Etiyopee, ¿Natuwa? ¿Iparshitinawa?  
¿Na tamara? tárange, Etiyopshat, Apanll waana  
zandku, kundarareetsish ichingarusin nllur  
tamapari ashisha taachinllinpa, kamapshimpa  
kamanku tárangeiya.

**33** Dapiyhat anoo mazinarangu, kapung mang' mantsarangu, nungtaranginya. Watandpunupshat káreeranllu, ambiri maaship kárkachu, wachup tanunukach ashiranginya. Tanuku tárangeya, Iparinaa Absalonarinaa. Iparinaa Absalonarinaa. Sitatsti, ipari tsipayanllu. ¿Mayaamsha nllurinaashtish tsiparangsha? Nuwaanacha wachini tsipakuri wanasisriya, tanuku ákamach ashiranginya.

Ashiriya, na kamaneena yuwaan Absalonarieetsini pacharangana anootsi.

## 19

*Ashiriya, na kamanchintspa yuwaan Jowab Dapiyaa izamzarangu anootsi*

**1-2** Tputsshitisin yuwaan Dapiy wip Absalonarini tsiparangu anungaz mang' mantsaku, tanuku anoo parangusin, Jowabaatsshhat kamankatssin naataranganaya. Dapiyhat wasundurur anuritam yuw kapung mang' ksaksin, shambatarangana, anoo kasayashtisin, mang' mantsakshitisin, shanee ashiranganaya.

**3** Ashirucha amb ashirangsin, ichingarusin sundar apinll naattusin, pázirpat yaktash pshturanganaya. Tapazeetspaz suwarangusina ashiranganaya. **4** Itaru, kurakshat wchoo chirikpat kámanarangu, kapung tanurangu, Iparinaa Absalonarinaa. Iparinaa, tanuku átar ashiranginya.

**5** Jowabshat kurakash pang' pshtuyaru, kurakaa tsiyataranginya. Kurakaatssha, ¿Mayaamsha iy shiyya taarasheetsish, ipareetstamtish,

mishat izanlleewaatstamtish, mishat izanllish mashingamawaatstam, tapachindarangitaatani, shiyhat iyaa tputsireetsish ipazamaam zandaksha? <sup>6</sup>Amb ashkush, shiy kundarareetsish kapung chinakpaz ashiksha. Itaru, yuwaatsinashat shiyaa taarashish tapachindarangu, anootsinasha sundarureewaatsish ichingaru tputsireetsish natsakpaz ashiksha. Waanariya Absalon kchitanaariya, iynaariya ashparitani tsiparanguni, anootsinaapa shiy mangish kapung ksachsha, tárange, <sup>7</sup>Pzaya, watsta. Shtungangi. ¿Mayaamsha amb ashiksha? Shitungeerush, sundarureetsish tsiyateerush, arang tuwizpurtangi. Papcha. Ndunnaa ashkush, uru zurampatari na psaan sundarurish ashparipa suwasuwachinllinaya. Amb ashkatssin, ¿shiyaa chakaja ksutchinllina? Shiyhat kanungasimash kiyung kachiyarangush, wachinarangush yutaritshish shiyaa tushiyrange, natsha tputsirish shiyaa kasakchusin, uru aranginashat mangish mantsatsha, tárange.

<sup>8</sup> Ashirucha, Dapiy anuritam chiyzayaranllu, yaktanung washitungash naateeru, kuxinarangshita. Tputsshitisin ichingarusin anoo yasarangusin, kurakangaz ashparitssin kusaranganaya.

Ashiriya, na kamaneena yuwa Jowab Dapiyaa izamzarangu anootsi.

*Ashiriya, na kamanchintspa yuwa Dapiy waptam watsapunip Irusarinap kanapurangu anootsi*

Anhat Israelchich yuw Absalonaa istarangana an yusur ichingarusin waptam pangup suwa-

suwaranganaya. <sup>9</sup> Ashirangsin, ichingarusin Israelchichin waanpatatin tsiyatkusin, Sirútari kurak Dapiy iyaa kundararini Filistewshuchee tpachingarangu, iyaa tapachindarangiya. Ashirangitaa, itaru wipamand Absalonarini kurakaam kinamaam zandarangu, anumand tsiyantayaru, minupshat tsap suwarangiya. <sup>10</sup> Ashirangu, iyshat ¿chakamunshitaja mangini tateechini? Atuni, Absalonaatstshat kurakareemani ínaranginiya. Itaru, na watam tapazishsha tsiparanguwa. Ashiri, ¿ndushat yusur Dapiyaatstam kurakareemich ínanda át? tárganaya.

<sup>11</sup> Dapiyshat yuwaal Israelchich waanpatatin tsiyatarangana anoo mazinarangu, uwshat apanllpanee Sadokaa, mishat Abiyataraatstam kuruzeeru, Siysat Utaáchichpa wachinanur tsiyatashinints, Kurak ateeja siyaatsi. ¿Mayaamshat zaptaksa? ¿Nda nuwaa musásiri yusur kurakareemis íaksa? Sheerus, ¿nuwaa nda pangipi yusur wayaksa? <sup>12</sup> ¿Antaati nuw siyapat tunareezini? Zuwanlltanicha. Kurasirini waannandaritcha. Ashiriya ambitaa ashiruni, ¿mayaamsha siysat nuwaa nda mikeerus kurakareemis íaksa? átcha kuraka, táyarus, <sup>13</sup> Amasayaa kamaningtamtsa. Kurak shiyyaa tárlleeha: Iy shiyyapat kapungcha zuwanlliniya; kurasirini waannandaritcha. Ashirucha, nuw shiyyaa kizpureem kurak ínamaam zandkashina. Na Jowabaa tashitungayaruri, shiyaatsshhat kurakaam ínachinllpa. Zurampataricha atashina. Nguti ngichkachinaareena, uru Apanllshapari nuwaa kapung wanichindanaya, átcha kurak

Dapiyaa tángtsa, táyaru, Dapiy tsiyatssee  
apanllpanish zanganirangiya.

<sup>14</sup> Dapiy amb tárangu anoo, Amasayshat mazinarangu, uwshat ichingaru Utaáchchhee tsiyatarangiya. Utaáchchhat anuritam chinaraungusin, tsiyatssee kurakaam zanganiran-ganaya. Kurakaa, mapiyrush, sundaruriptish urkar ashpari ningtam kanapeerush kusangcha, táranganaya. <sup>15</sup> Kurakshat anoo mazinarangu, kanapeeshinu, kung Ortagamun kusarangiya. Utaáchchhat chamayangakatssin, Guilgaalash tsap kusaranganaya. Ortagaa kung arachich kitamaam istakatssina. <sup>16</sup> Benjaminarinchichshat, Guerarini wip yuw Bahurimash nllurtarangu, anshat sur Simiy Dapiyangaz chamayangakatam káyaranllu, Utaáchchpat washunand yápandayarandsin naataranganaya. <sup>17</sup> Benjaminarinchich mil tputs washunand yápandayarandsin naataranganaya. Sibaatsshhat Saularineetsini maachiri ksutamapan taarangu anshat, anshutam wip ashpari 15, muchchurshat 20 taaru, ashparitssin naatarangsin, ndaturi kurak anush kusaru, uwmasin Ortagash kung kusaranganaya. <sup>18</sup> Ashirucha, Kurakaa arachich itsipungayaruni, kuraksha iyaa kissa napchiya, atusin, anoom kapung istaranganaya. Wipaatstam putayarusin, arachich itsipungayarusin kasaranganaya.

Anshat kurak arachich kitaramchu anush, Simiyshat, yuw Dapiyaam patumbchee kapeetarangu, anshat kurakanung iriptaranllu much tsapush timuchta sheeru, <sup>19</sup> Kurakaa, nuw shiyya atina. Yuwamand shiyya Irusarinash

shitungeeshinush, nuw mantsir tsiyatarangi, anumand nuwaa tsiyantarishpa; anoo izuuru mbizangcha. Na shiyaatsimarishat kukish payukuni, taachinipa. <sup>20</sup> Nuw Osiyarinchichtana. Ashirucha, yuwaa nuw shiyaa mantsir tsiyatarangi anoo nuwaanaatsi yasaranguri, nuw wasina shiyangaz tsiyatati aturi, nuwma imazayaruri kusarangi, tárangya.

<sup>21</sup> Abisayshat Seroyerini wip, ¿Mayaamsha kurakaa, shiy nee Simiyaa napaksha? Pachayarush ksachishpa, watam shiyaa Apanlleetstaatish ipusamarini mantsir tsiyataranguwa, tárangya.

<sup>22</sup> Kurakshat, Nduni shiy nuwaa tamundarishta. ¿Antaati shiyaa Seroyaatsish wipish tsiyatak? Watam na nuwaa Israelchich yusur chinrangusin, kurakaam ínaranganawa. Ashiriya, amb ashirangsin, nuwshat ¿mayamandshitaja Israelchichee msangeeri pachachee? tárangya.

<sup>23</sup> Ashirucha, Dapiy amb tárangu, Simiyaa, zurrampatari nuw shiyaa pachachinllpa, tárangya.

<sup>24</sup> Saularinshat wachinllin Mefiboset kurakaa chamayangarangitamta. Anshat Mefiboset yuwapur Dapiy Irusarinash tsap shitungarangu, anpuri kapung Dapiyangaz mang' mantsarangu nda chumaku, mishat wamareetstam nda káchaku, mishat wasusootstam nda kumaku anuri pásisru anush Dapiy kanapeeshinu kusarangya.

<sup>25</sup> Ashirucha, ashimari Irusarinamand káyashinu, kurakangaz chamayangakatu kusarangu, kuraksha anoo parangu, Mefibosetaa masharangya. ¿Mayaamsha shiy yuwapururi nuw naatarangi anpur nda nuwash tachitarangsha?

tárangu, <sup>26</sup> Mefibosetshat, Ichee kurakaa, watam nuw kutsi wanguy kuyamchinawa; nda putit naamaam waritakinawa. Ashirucha, m'chachureetsi Sebaa kamachtaranguri, Nuwaam burr putayarush, yarangi kurakaripi pangatama, tárangitaati, itaru m'chachurshiti nuwaa mangu tamapingarangiya. <sup>27</sup> Amb sheeru, nuwaa yutaritaam ínayaru, shiyapshat nuwamun ngichirangiya. Ashiriya shiyhat, watam Apanll wasundurur ashirush taakshawa, nuwaa yuwari shaana zandkish anuritam shingandama, tárangiya. <sup>28</sup> Shiy nuwaa pachirinimandi Saularinimand pachamaam waritartaa, shiyhat mangish wanasureerush aparinimandi Jonatanamand nuwaa kapung chinarangsha. Ashirangush, nuwapat washunand shiyamun misarish katungaranginiya. Ashiri amb ashkuri, ¿mayaatsee shiyaa arang mashchi? tárangiya.

<sup>29</sup> Kurakshat, ¿Mayaatsi tsiyateechich? Arang nuw tsiyatssiri wanindaja. Nuw Sibaa sirútari kamachtarangina. Siyat Mefibosetash watsapun tarawatzakchus, waama pakchitam panangtsa, tárangi. Anuri wandari nuw chinakina, tárangiya.

<sup>30</sup> Mefibosetshat, Waanipari Sibsha watsapuneem ashchiri yachiya. Nuw tsapungaz mangi mantsakeezi, watam kaapa yuwangaz mangi mantsakuri, kurakari yusur kchit kanapuchpa táranguri, na shiyhat yusur pangishish kusarangush, na mangi kischa, tárangiya.

<sup>31</sup> Anpurshat min tputs Barsilay Dapiyangaz napkatu watsapunimand Galaadamand káyashinu, Rokelimash tsap chamayangayaranllu,

Ortagaa kung arachich itsipungakatu tachitaranginya. Anush arachich itsipungaramchu, yusur waptam kanapuranginya. <sup>32</sup> Barsilaysha kizpur wachin masachirini 80 taaranginya. Anshat mang yuwapur Dapiy Majanayimap tsap suwarangu anpur kizpur kurikpan taaranginya. Ashirucha, Dapiyaamsha maacheetsi yuwangaz zandku, anuwaa zapan istarangiya.

<sup>33</sup> Dapiyhat Barsilayaa tsiyatarangu, Pzaa. Shiyapa nuwap tsapuni Irusarinap naayani. Amb nuw shiyya ksutchinllpa, tárangiya. <sup>34</sup> Itaru, Barsilayhat, ¿Tamari na wachinayanlluri tsipani tutundeenllshat, shiyap tsapunish Irusarinap naachi? Mutatayanllshacha tsipani. <sup>35</sup> Watam naturi 80 masachiri taaruwa. Katungamaamtam ndushat kis káchayaruri katungkina. Waamaamtam mangutarishti kamasingaruri waakina. Amb ashkuri, katungtsee ksamsheewa, mishat yutaritawaatstam ndushat káchakina. Mishat, ¿antaati yaseesshee yaseekana, kizawtamsin yaseekana anoo mazinacheezi? watam kitsi zamamawshitawa. Ambshapari ashkuri, shiyaatsshhat tuxarakuri, shiyhat nuwapat mápeetshasha. Nda ashishtamaam kurakaa, ¿mayaamaja nuw shiyap naachi? <sup>36</sup> Watam na yuwangzina kapung zandarangi anootsina na shiyaam istaranguri, na arachich kiteenshawa. Mishat, ¿mayamandshat shiy nuwaam kapung istamaam zandaksha? watam nuw shiyaam Ortagaatsim kitamaam istaranginawa. <sup>37</sup> Ashirucha, nuw kurakaa, shiyya atashina. Nuwaa ksangandama. Nuw nuwaanpeetam tsapuni naayaruri,

tsipamma. Ambiri tsipakchuri, nuwaatsshhat aparninungiritam mapchinllinaya. Itaru, neewa. Nuw ipari sur Kimjama machimaam tsapunpish zandkinaareesha, maachtatcha. Zandkush shaamatari tputsirish izuuru yamangcha, tárangeya.

**38** Kurakshat ashiri ipareetsish Kimjama nuwaanpee tsapuni machchima, watam shaana átshawa. Ashiri yuwari shaana átish anuritam ashtachima. Uru nuwaamatari tputsiri yamakchuri, nuwashurisha taachiya, tárangeya.

**39** Anshat ichingaru tputs Ortagaa kitarangsin, kurakshat kitarangtam, Barsilaya kasakchu, pachipeeru, ishambeersin kasaranganaya. Ashiriya amb ashirangsin, Barsilay yusur waptam watsapunip kanapurangya.

**40** Kurakshat tiptsir ashpari Utaáchich Kimjampatatum washunandari káyarandsin, Guigalaap tsap naataranganaya. Israelchich chawpitam anush tachitaranganaya.

**41** Israelchichshitisin kurakash kuseersin, ¿Mayaamshat Utaáchich ashparitisin shiyya pachindkanaya? Káchingayarandsin, shiyangaz Ortagamun kuseersin, uwshritisn shiyya amuytayarusin, istanda tápani atusin, pachindkanaya, tárangeya.

**42** Utaáchichshitisin tsiyatarangsin, ¿Antaati iy mangutaritani ashpini kachingaruni kusaranganee? Watam nee kurakaa yaantari Utaáchchini zuwanlliniwa. Ashiri siysat ¿mayamandsha iyya tsiyantaksa? Mishat, ¿antaati iy mangutaritani kurakash kuseeruni katungkinee? Machtawaat-

stam ḡantaati iyaam mangutaritaja panak? Nda, uwshtisin táranganaya.

<sup>43</sup> Yusur Israelchichshitisin tsiyatarangsin, Itaru, kaapa yaanacha siyamand arang kurakaa amuytashiniya. Iynaa siyaa Utaáchcheetsis yanuruni, zapantanicha. Ashiriya, ḡmayaamsha siy iyaa niyraksa? Watam iyma chtaru kurakareetsini kanapungi táranguni, na kurakareetsini yanpuranginiwa, táranganaya.

Tárangitaatssin, Utaáchich kapung tsiyantarangusin, Israelchichpat nambaranganaya.

Ashiriya, na kamaneena yuwaan Dapiyarini yusur watsapunishtam kusarangu anootsi.

## 22

*Ashiriya, na kamanchintspa yuwaan Dapiyarini yaseeku tárangu anootsi*

<sup>1</sup> Dapiyarini Apanlee yaseeku, Apanll nuwaa tapachindarangu, Saularini nda pacharanganda, mishat kundartamti nda nuwaa pacharangiya, átu yaseeku tárangiya.

<sup>2</sup> Apaa, shiyamari kizpureerush, nuwaa tapachindarangush,  
nuw patumbchishpaz wach pshturanguri, ashiru shiyash kamungarangi.

<sup>3</sup> Shiyash patumbich wach tamapari ashiru anush  
nuw kamungkina; nuwaa tapachindaksha.  
Mishat, xanxapishpapaz kámanaku ashiru nuwaa  
wizpurirpatish kámanakush, nuwshat ka-  
mungkina.

Mishat, arang yuwarpz kámanaru ashiru anush  
nuwaa pishuksha.

Ashkush, shiyamari wizpurirpatish nuwaa  
ksutkush taaraasheetsi tapachindaksha.  
Nuwaa tputs kiyung yachamaam zan-  
darangtaatssin, itaru shiyhat nuwaa  
tapachindarangsha.

<sup>4</sup> Apaa, shiyaatsimaritcha wanasureem ínamaam  
waritaksha.

¿Nuw shiyyaa wanipaja masharangi?

Nuwaam istanda táranguri, shiyhat nuwaa kun-  
darari tapachindarangsha.

<sup>5</sup> Nuw tsipamaam waritarangina.

Waraspaz ashiru nuwaa mangeetsi  
yambutarangu, nuwshat kapung  
punirustarangina.

<sup>6</sup> Mishat, wanumbpapaz maachteam tut sang-  
tarich,  
ashimashtaa nuwaam tsipamaam waritarangi-  
taati, <sup>7</sup> nuwaa taxararangusin,

¿Tamayareezi kamungchi? táranguri,

Apaa, shiyatsshhat pangishish mashiranguri, ka-  
pung tanuranguri,

shiyhat k'keetsi mazinarangush,

<sup>8</sup> shiyhat yuwamand tsipats kinarangi anumand  
kapung tsiyantarangush,  
tsap kapung mundaztarangu, kanindpitam  
mundaztarangya.

Shaana Apaa, wizpurirpatish ashirangsha.

<sup>9</sup> Mishat, kizpur tsiyantarangush, shipishish msas  
ashiru kizpur shitungarangya.

K'kishitish sumas ashiru shitungarangu, watsam  
ashiru kurakurtaru, ningeem zanganirang-  
sha.

- <sup>10</sup> Kanindaa wach tawatak paz ashirangush,  
msaseetsshat kizpur tuwap tsapush  
zanganirangsha.
- <sup>11</sup> Ashirangush, kambusur machimun pantsat-  
tarangu,  
maacheetsi wazitpungach wanindawa tpuran-  
garangu, kambusurush naatarangiya.
- <sup>12</sup> Kambusurshat kizpur tap ashirangu,  
sinshat sinamaam zandarangu, anushshat shiy  
tapishurangsha.
- <sup>13</sup> Anushshat, kapung kariytarangu,  
watsamshat sumas sin ashiru tsapush pantsat-  
tarangiya.
- <sup>14</sup> Ashirucha, Apanllimari kizpureeru, kariyaa  
zanganku,  
kapung kariytakachu, kanindap kimakiya.
- <sup>15</sup> Ashirangu, kundarareetstamti mangoo tama-  
marpamaam wásaparinpa tiyanurangu,  
mamaroo kayungarangu, kizpur mamar-  
tarangiya.
- <sup>16</sup> Tputsee wanimaaam zandarangu,  
kizpur maraa kung tapusirangu, tsapoo wan-  
shuchee puzarangiya.  
Tputsshitisin ichingarusin tsapoo wanshuchee  
paranganaya.
- <sup>17</sup> Apanllshat waana íwarimand uw paxayarangu,  
uwish nuwaa wayarangu,  
nuwshat mar kapungootstaa kitarangina.
- <sup>18</sup> Amb ashiranguri, kundarari kizpureewtaatssin  
nda nuwaa pacharangusin,  
nuwamaritam kamungarangina, nuwaa kapung-  
taa natsarangusina.

Uwshtisin tputs nuwamand kizpureew  
taaranganaya.

<sup>19</sup> Yuwash nuw wizpuriri ndunareerangu anush,  
nuwaa pachamaam zandarangsin,  
itaru Apanllsha nuwaa istarangu,  
<sup>20</sup> nuwaa tashitungarangiya.

Ashirangu, nuwshat kamungarangina.

Apanll nuwaa kapung chinaku ashirangiya.

<sup>21</sup> Watam nuwshat wanasis taaranginawa.

Ashirucha, Apanllshat nuwaam wanasisitam is-  
tarangiya.

<sup>22</sup> Watam nuw Apanllish kis tachitaranginawa.

Ashiranguri, ayamamtiyam nuw Apanllee nda  
kasachina.

<sup>23</sup> Ichingaru yuwaas tsiyatarangu anootstam nuw  
payuranguri,

nda minumtiyam kukoo kapeetarangina.

<sup>24</sup> Amb ashiranguri, wanasis taarangina;

nda yutaritshishush pshturangina;

yutaritshisheetsshhat izuuru kasarangina.

<sup>25</sup> Ashirucha yuwamand nuw kizpur wanasis  
tárange anumandtam,

Apanllsha nuwaam wanasisitam istarangiya.

<sup>26</sup> Apaa, shiyaa tputs k'keetsish payukana,  
anoo shiyhat wanasisitam napaksha.

Mishat, nda yutaritshishush pshtukana, anoot-  
stam shiyhat chinaksha.

<sup>27</sup> Zurampatari shiyaa chinakana, anoo shiyhat  
zurampatartatam chinaksha.

Itaru, tputs tamapingampaneetsshhat, shiyhat zu-  
rampatari waneeksha.

- 28** Mishat, yuwaatsimari shiyaa kukish payukana  
anootsimari tapachindaksha.  
Itaru, yuwaatsshhat shiyaa kukish nda payuksin,  
waanaatstamari chinakana,  
anootsshhat shiyhat waneeksha.\*
- 29** Apaa, shiyamari nuwaa tuwasineeksha.  
Apaa, shiyaa nuwcha Apanlliri.  
Ashirucha, nuw tapish taamaam waritaktaati,  
itaru shiyhat nuwaa mangeetsi tuwasineeksha.
- 30** Shiy nuwaam istarangush, nuwamari kundara-  
reetsi kasirangina.  
Mishat, yakat tandapunumaatsta nuwamaritam  
pshturangina.
- 31** Ashirucha, Apanllimari wamachtash kizpur  
wanasiriya.  
Mishat, Apanllimunari kuk chiy mangich  
tatukchi.  
Tputs Apanllimunamari mang' tatku anoo uwshat  
ksutkiya.
- 32** ¿Tamamshat Apanlee kasiru min taaraa?  
Mishat, ¿taamaam Apanll iyaa taarasheetsini  
kizpur wanasis ksutka?
- 33** Apanllimari kizpureeru, iyaa taarasheetsini  
tapachindakiya.  
Mishat, yutaritshishireetsini tachingkiya.
- 34** Nuwaam istarangu, k'tseetsi murish  
wayarangu,  
nuwshat manllanus ashiruri machpitaa  
káriranguri, nda pantsarangina.
- 35** Apanll tapazeemtam waratamaam nuwaa  
tuxapshingarangiya.

---

\* **22:28** Lukasa 1.51-53 tsiyatsis nipta tatsamooru taaritamta.

Ashirangu, nuwshat wizpuriri kapung taaranguri,  
 tsaktsakaa ngusambaatstaa tinamaa yáyaruri,  
 mbamaatstaa tsak ashirangina tputseem pachamaama.

<sup>36</sup> Apaa, shiyamari nuwaa tapachindarangush,  
 nuwshat kamungarangina.

Amb ashirangush, nuwamari kizpur taakina.

<sup>37</sup> Nuwaa wanasisrip ngoots tuyamandarangush,  
 nuwshat amb naataranguri, nda pakchiyam pantsarangina.

<sup>38</sup> Ashirucha, kundarareetsi pacharanguri, nuwamari ashparitaa kachingaranguri,  
 yusur nuwamaritam kanapurangina.

<sup>39</sup> Nuwamari kundarareetsi izuuru kachingeeri,  
 zurampatari tpachingarangina.

Pantsarangusin, ayamtaati yusur chiyzachazinlli-naja.

Nuwanungiri tum tum ashiranganaya.

<sup>40</sup> Apanllsha nuwaa kapung wizpurireemi panarangiya tapazeem waratamaama.

Ashirangu, yuw tputs nuwaa natsamaam zandarangana,  
 anoo nuwamari kasiranguri, nuwanungeem timuchta ashiranganaya.

<sup>41</sup> Itaru, nuwshat kundarari kizpur puniksin suwaranganaya.

Amb sheeruri, kundarareetsi nuwamari kasirangina.

<sup>42</sup> Ashirangsin, tputseewaatstam istanda tárangitaatssin,

itaru tputsshitisin nda istaranganaya.

Apanllingaztam kuruzurangsin, Apanllshat  
nduntam mazinarangiya.

**43** Izuuru kachingaranguri, tsapoo tachuwcha-  
yaruch, wasipureem ínatarich ashirangina.  
Ashiranguri, tsiparimun kapcharanguri, shara-  
mungash kapchatarich ashirangina.

**44** Apaa, tputs iyaa natsarangana anoo shiyhat  
tpachingarush, nuwaa kurakaam  
ínarangsha.

Ashirangush, na tputs ichingarusin nduntaa  
nuwaa natstaksin, k'keetsi payukanaya.

**45** Arapcheewtamsin nuwash kuseersin, nuwaa  
kis ungirtakanaya.

Yuwaatstam kamachtaki anootstam kis mazina-  
yarusin, payukanaya.

**46** Tputs arapcheew kuseersin, nuwaa  
nungtaksin,  
tapishutusin, púnirpatari kuskanaya.

**47** Ashiri Apaa, shiyamari urutamari taatsha.  
Shiyashumari nuw kamungkina.

Shiyaatsimari nuw wanasir tsiyatchima. Shiy  
nuwaa taaraasheetsi tapachindaksha.

**48** Shiyhat Apanlleerush kurandarareetsini kisa-  
tarangish.

Tputsshitisin ichingaru na nuwaa ksutkanaya.

**49** Apaa, nuwaa kundarari natsamaam  
zandarangtaatssin,  
itaru shiyhat Apanlleerush, nuwaa kundarari  
kizpureewaatstaa,  
ashtaa nuwaa tapachindarangsha.

**50** Ashirucha, yuwamand ashirangish anumand

nuwshat ichingarupa tsapurunas shiyyaa surish  
shambatkiniya.\*

<sup>51</sup> Shiyamari kasirangush, nuwaatssha kurakaam  
ínarangsha.

Shiy kurakish kizpureerush, shaana nuwaa ku-  
rakaam ipusarangsha.

Shiy urutamari nuwaa, mishat chinllineetstamti  
kis napaksha,

Dapiy tárangiya.

Ashiriya, na kamaneena yuwaa Dapiyarini  
yaseeku tárangu anootsi.

## 23

*Ashiriya, na kamanchintspa yuwaa Dapiy  
tuwatspamamari tsiyatarangu anootsi*

<sup>1</sup> Dapiyarini kuk tuwatspamaam tsiyatku  
tárangiya. Dapiya Jeseyarini wipa. Apanll waana  
Dapiyaa kizpureem kurak ínarangiya. Yuwamand  
Akoparini Apanlee kapung chinlarangu,  
anumandtam Apanllsha Dapiyarineetsi  
kurakaam ipusarangya. Dapiyhat Israelchich  
kis yasimpan taarangiya.

Dapiy tárangiya.

<sup>2</sup> Apanll waana wanee zanganirangu, nuwaa tut-  
siyatstarangiya.\*

Ashirucha, nuwsha kis tsiyatchina.

<sup>3</sup> Israelchich Apanllirini tárangiya;

---

\* **22:50** Yuwaa nish átu anootstam Romshucheema 15.9 tayusima  
kamankiya. \* **23:2** Tayaspatapani 2.30 tsiyatsis nipta tat-  
samooru taaritamta.

Nuw Israelchicheem tapachindampaneem  
taachima,

Apanll waana nuwaa tárangiya.

Kurak tiptsiree taárash itsinsaru yasakchu, nuwaa  
kuki tatsamooru payukchu,  
nuwsha kis chinachina.

<sup>4</sup> Urutamari kis taachiya.

Kanindap 'sinitaraa ashikpaz ashtachiya.

Zartam tarasitaranllu, puturi msas ndunariri  
kizpur 'sineekchu,  
mzatsish maachi kis kxunkachu, anumunshapaz  
sin sinakchu,  
kuraksha ashikpaz ashiru kis taachiya, Apanll  
tárangiya.

<sup>5</sup> Ashirucha, nuw nlluranuri urutamari Apan-  
llchicheem taachinllinaya.

Watam Apanll waana urutamari shiyachchee  
kasacheezi, táranguwa.

Ashirucha, nuwamari kundarareetsi kasikina.

Apanllsha nuwaa istakchu, yuwari nuw chinaki  
anoo  
zurampatari tatsameerinand kasachiya.

<sup>6</sup> Itaru, tputs yutaritshishpanshitisin kap tama-  
pari ashirusin taakanaya.

¿Chakaja kpaa tputs uwpat putayach?

Ashiri arap kpaa kapeetamaam waritakcha.

<sup>7</sup> Itaru, chiyshat kpaa patatamaam zandkuch,  
ngusamb pazuyaruch, patatamaam waritakiya.

Anootsshhat sumasish pshtamaam waritakiya, izu-  
uru ashpari muchimaama,

Dapiy tárangiya.

Ashiriya, na kamaneena yuwa Dapiyarini kuk  
iwatsparangu anootsi.

[Wapparee. Watamcha Samuelarini kuku kuz-  
izimon yandama.]

**Apanlli Kuku  
New Testament in Candoshi-Shapra  
(PE:cbu:Candoshi-Shapra)**

copyright © 2010 Wycliffe Bible Translators, Inc.

Language: Candoshi-Shapra

Translation by: Wycliffe Bible Translators, Inc.

Candoshi-Shapra

cbu

Peru

**Copyright Information**

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Candoshi-Shapra

**© 2010, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

---

PDF generated using Haiola and XeLaTeX on 11 Nov 2022 from source files  
dated 29 Jan 2022

855c1646-aaa4-5dab-a701-8197de4af05f